

Kurzer Bericht/

**Daß die Jenigen / so**

**sich Lutherisch nennen / im wenigsten**

nicht/ wie sehr sie sich auch eines solchen berühmen/

bey der Ordnung vnd den Worten der Einfassung des Abend-

mals des H E X X E n Christi verbleiben/ sondern durchaus/

beyde die Ceremonien vnd Lehr deroselben ändern vnd verkeh-

ren: Auch sich an den Worten des H. Apostels Pauli/ in der 1.

zu den Corinth. am 10. Capitel: Das Brot das wir bre-

cken/ u. die bey aufspendung des Abendmals in den refor-

mirten Pfälzischen Kirchen gebrauchet werden/ mit Unfug

ärgern. Sampt einer kurzen ableinung etlicher vnerhebli-

cher Ursachen / welche sie zu beschönung ihres

Irthumbs eyn vnd fürwenden.

¶

Antw. S. 101

Benneben

**Einer kurzen vnd einfältigen Erinne-**

**rung/ Daß sich ein Christ der die Warheit erkanni**

vnd angenommen hat/ des Namens SCHWERMER vnd

anderer derogleichen / damit die jenigen / so der reinen Refor-

mirten Religion zugethan seynd/ von den Gottlosen Welt-

Kindern/ heutiges Tags belumbt / vnd verlästert

werden / nicht beschweren noch beschämen/

auch nicht Scheltwort mit Schelt-

worten vergelten solle.

W

In der Churfürstlichen Statt Heidelberg/

durch Abraham Smefman. Anno 1591.

THE [illegible] [illegible] [illegible]

[illegible] [illegible] [illegible] [illegible] [illegible]

[illegible] [illegible] [illegible] [illegible] [illegible]

[illegible] [illegible] [illegible] [illegible] [illegible]

[illegible] [illegible] [illegible] [illegible] [illegible]

[illegible] [illegible] [illegible] [illegible] [illegible]

[illegible] [illegible] [illegible] [illegible] [illegible]



# Den Edlen / Ehrnve.

sten / Ehrsamem / Fürsichtigen vnd Weisen  
Herrn / Schultheiß / Burgermeister / vnd Rath / sampt  
aller gantzen ehrbaren Burgerschafft / der  
Churfürstlichen Pfalz Statt Heidelberg /  
meinen insonders günstigen Herren /  
vnd guten Freunden.

**D**er / Ehrnveste / Ehrsame / Für-  
sichtige Weise / insonders günstige Herrn / vnd  
ehrbare gute Freundt : Es schreibet der alte  
Kirchenlehrer Hieronymus sehr schön / Daß das Blut  
unsers lieben Herrn vnd Heilands Jesu Christi / sey der Schlüssel  
zum Paradiß / Weil er nemlich zum Mörder am Creutz  
gesagt hat / Heut wirstu bey mir seyn im Paradiß.

Vnd wolte der Allmächtige barmherzige Gott / daß  
dieser fürtreffliche werthe Schlüssel / doch einmal er-  
landt / von vns mit allem angelegenem fleiß gesucht /  
vnd sonderlich von denen / die heutigs tags allein an  
den bloßen Namen der Religion / vnd eusserlichen Ele-  
menten der Sacramenten hangen / recht zu gemüth

geführt/ betrachtet vnd gelehret würde/ dasjenige/ welches Origenes von diesem Schlüssel mit solchen Worten schreibet: Et tu, qui ad pontificem verum venisti, qui sanguine suo Deū tibi propitium fecit, & reconciliauit te Patri; non hāreas in sanguine carnis, sed discce potius sanguinem verbi, & audi ipsum dicentem tibi: Quia hic sanguis meus est, qui pro vobis effunditur in remissionem peccatorum. Das ist/ Vnd du/ der du zu dem rechten wahren Hohenprieister kommen bist/ welcher mit seinem Blut dir Genad bey Gott erworben/ vnd dich mit dem Vatter versöhnet hat/ solt nicht hangen an dem Blut des Fleisches/ sondern lehre vnd fasse viel mehr das Blut des ewigen Worts/ vnd höre daß dasselbige zu dir saget: Dann diß ist mein Blut/ welches für euch vergossen wirdt/ zur vergebung der Sünden.

Zwar es haben auch die Israeliten vorzeiten Wasser von dem Felsen getruncken: Was hat es aber die vnder ihnen geholffen/welche gestorben sendt? Darumb daß (wie Cyrillus saget/) nicht dasselbige/ sondern das Blut Christi/ der rechte wahre Franck ist/ durch welche der Todt gänzlich zerstöret vnd aufgetilget wirdt.

Aber es ist E. Ehrv. Ehrsam. Fürsicht. Weißheiten/ vnd jedermänniglichen allhie vnderborgen/ daß nun ein ziemliche lange zeit hero/ nicht allein in dieser Statt Heidelberg/ sonder auch allenthalben in der  
 Schur.



Churfürstlichen Pfaltz/durch Gottes sonderbare gna-  
 dige Verleihung / dieser thewre Schatz vnd köstliche  
 Schlüssel zum Paradies vnd dem ewigen Leben/ auß  
 dem grund der Prophetischen vñ Apostolischen schriff-  
 ten/ wie auch dem einhelligen Consens der vhralten  
 rechtgläubigen Christenheit/ rein vnd richtig/ nit allein  
 auff den Ganklen in öffentlichen Predigten / sonder  
 auch in vnderchiedlichen / zu diesem Ende angestellten  
 vnd gehaltenen Kirchen Visitationen / vnd sondere-  
 baren Christlichen Handlungen / mit allem angelege-  
 nem treuem fleiß vnd höchstem ernst / jedermännig-  
 lichen angeboten/gezeigt vnd gewiesen worden.

Insonderheit haben E. Ehrvv. Ehrsam. Fürsicht.  
 Weißheiten/ vnd ihr die Burgerschaft allhie / noch in  
 guter frischer gedächtnuß/ mit was Christlichem Euer  
 vnd wolgemeinter treuwertziger Vätterlicher vorsorg/  
 der Durchleuchtigst Hochgeborn Fürst vnd Herz/ Herz  
 Johann Casimir / Pfaltzgraff bey Rhein / Herzog in  
 Bayern/ıc. Vormund/ vnd der Churfürstlichen Pfaltz  
 Administrator / vnser gnädigster Herz/ vor einem  
 Jar in dieser Statt/ ein Christliche Visitation haltē/  
 auch derselben selbst eigener Person / beyneben dem  
 auch Durchleuchtigen Hochgebornen Fürsten vñnd  
 Herren/ Herren Friderichen Pfaltzgraffen bey Rhein/  
 Herzogen in Bayern / ıc. vnserer gnädigen jungen  
 Herrschaft/ embsig vnd fleißig/ so viel ihren Fürstlichen  
 Gnaden/ anderer dero auch hochwichtige Obligen hal-  
 A uß ben/

Benede.

ben immer müsslich gewesen / bengetwöhnet / vnd in sol-  
cher Visitation von einem jeden insonderheit die vrsa-  
chen vnd hindernussen / so ihne von vnser in GD Etes  
Wort gegründter Christlichen Confession / vnd dem  
gebrauch des heiligen Abendmals abhalten / vernem-  
men / dieselben mit grund der heiligen Schrift widerle-  
gen / vnd die irrende einfältige / welche dieser Lehre nicht  
gnugsam bericht / auß dem Wort Gottes besser vnder-  
richten / vnd also dero jedem insonderheit den gemel-  
ten Schlüssel zum Paradiß vnnnd dem ewigen Leben /  
richtig / klarlich / verständlich vnd deutlich anzeigen vnd  
weisen / auch sie für den adulterinis clauibus vnd  
falschen oder nebenschlüsseln / darauff ihrer viel das  
vertrauen gesetzt / vnnnd den Himmel damit auffzu-  
schließen vermeinet / trewlich vnnnd fleissig verwarnen  
lassen haben.

Ob nun wol dieselbige fast alle mit einander / etliche  
wenige halßstarrige außgenommen / solchen bericht vnd  
trewe warnung damals mit fleiß angehört / der meh-  
rertheil denselben / als Gottes Wort durchaus gemäß /  
gebillichet / vnd ihne belieben lassen / auch den Sachen  
in der forcht Gottes / mit anruffung seines heiligen  
Namens / besser nachzudencken / vnd bey ihrer ordent-  
lichen Kirchendienern / von denselben weittern vnder-  
richt darunder einzunehmen / sich anzuzeigen vnd für-  
derlich einzustellen / zugesagt vnd versprochen haben.  
So ist jedoch ein solches biß dahero bey vielen ziem-  
lich

lich in vergessz gestellt / vnd von dem wenigern theil ge-  
leitet vnd ins Werck gerichtet worden.

Wann ich mir aber keinen zweiffel mache/ es wer-  
den vnder denselben noch etliche gutherzige seyn/  
denen ihre Wolsahrt angelegen / vnnnd welchen es  
mit der ewigen Seligkeit kein schimpff / sonder ein  
rechter ernst ist:

So hab ich denselben vnd andern einfältigen / die  
der Warheit begierig seynndt / zu gutem / diesen kurzen  
Bericht/einfältiger weisse zusammen getragen / damit  
sie auß demselben vernennen / vnd als mit den Augen  
klürlich sehen / vnd mit den Händen greiffen / wie gar  
nichtig / vergeblich vnd eytel sey der Ruhm deren / die  
sich im Handel deß Abendmals auff die durre / helle/  
klare / druckene wort der Einsatzung desselben so starck  
beruffen / vnd daß sie bey denselben schlecht vnd einfäl-  
tig verbleiben / fürgeben / sampt einer ableinung der  
fürnehmsten vrsachen vnd vermeinten behelff / welche  
sie / ihren gefassten Wahn vnnnd Irthumb dardurch  
zuehaupten / vnd sich darinnen auffzuhalten / cyn vnd  
fürzuwenden pflegen / damit die frommen einfältigen /  
die vielleicht diesem Handel nicht so weit nachgedacht /  
vrsach vnnnd anlaß haben / die Sach im grund et-  
was besser zuertwegen / vnnnd also einmal in sich selbs  
gehen / den Irthumb fahren lassen / vnnnd vmb ihres  
ewigen Heils willen / der Warheit gehöre vnnnd platz  
geben.

Ich

Ich hab darbeneben aber auch dieseit einfältigen  
 kurzen Bericht/ oder diß kleine Tractätlein/ E. Ehrw.  
 Ehrsam. Fürsicht. Weißheiten / vund einer löblichen  
 Burger schafft allhie/ darumb fürnehmlich dedicirt  
 vnd zuschreiben wollen/. Erstlich/ die weil in demselben  
 vnder andern auch kürzlich angeregt vnd widerholet  
 wirdt/ dasjenige/ so in obgemelter allhieiger Visita-  
 tion / ( wie gleichfalls auch sonst in andern der  
 Churfürstlichen Pfaltz Kirchen Visitationen ) farge-  
 gebracht worden/ vund E. Ehrw. Fürsicht. Weißhei-  
 ten eines solchen / als die derselben allhie gehaltenen  
 Visitation, von anfang biß zum ende/ zum fleißigsten  
 bengethewet/ Zeugen seyndt: auffdaß also durch diese  
 widerholung vnd erinnerung / diejenigen / welche biß  
 her obvermeltem ihrem versprechen / sich der Warheit  
 besser berichten zulassen/ noch keine vollziehung ge-  
 than/ dasselbige nachmals ins Werk zu richten/ vund  
 den Schlüssel zum Paradeiß mit mehrern ernst/ als  
 beschehen / zu suchen gerisset vnd bewegt werden.

Vnd zum andern/ daß ich durch diß geringe Werk/  
 meine wolmeinung gegen E. Ehrw. Fürsicht. Weiß-  
 heiten / vund euch / als meinen lieben Mitbrüdern in  
 der Christlichen Gemeine / vnd Mithausgenossen im  
 Hauß des Herzen allhie/ wie auch mein schuldig danck-  
 bar Gemüth/ für die mir biß dahero erzeigte vielfaltige  
 freundschaften vund gutthaten / erklären vund zuver-  
 stehen geben möchte / dasselbe aber jedoch nur eillicher  
 massen/

massen / dieweil ich es sehr in mehren / darzu ich son-  
 sen ganz willig vnd geneigt were / zuthun nicht ver-  
 mag.

Bitte demnach zuvorderst den getrewen barmher-  
 zigen G D E E / daß er vns alle sampt mit den Au-  
 gen seiner Barmherzigkeit genädig anseh / vnd vn-  
 ser Herzen erleuchten wölle / daß wir in dem / das die  
 Wahrheit vñ unsere ewige Seligkeit antrifft / nicht auff  
 Menschen oder andere zeitliche ding sehen / noch an den  
 irdischen eusserlichen Elementen haften / Sondern al-  
 lein auff G D E E vnd sein heiliges vns geoffenbartes  
 Wort sehen / den rechten Schlüssel zum Paradiß er-  
 greiffen / an denselben vns mit wahrem Glauben steiff  
 halten / Also das ende vnsers Glaubens / nemlich / die  
 ewige Seligkeit / mit einander dart on bringen / vñnd  
 unsern getrewen lieben H E R R E N vñnd Heiland  
 Iesum Christum / der vns nicht mit zergänglichem  
 Goldt oder Silber / sondern mit seinem heiligen Blut  
 theuer erkauft / vnd den Himmel auffgeschlossen hat /  
 mit allen seinen heiligen Engeln vñnd außerswählten  
 gläubigen Kindern / in vnaussprechlicher vñnzergäng-  
 licher freude / immer vnd ewig loben / ehren vnd preis-  
 schen mögen.

Darnach / so bitte ich auch E. Ehrw. Ehrsam. Für-  
 sicht. Weißheiten / vñnd euch / die gemeine Burger-  
 schafft / ganz dienstlich / freundlich vnd fleissig / sie wöl-  
 len diß mein Schreiben / nit in vngutem / sondern weil

es in höchster Warheit/nderst nicht / als treflich vnd  
volgemeint/es auch also von mir günstig vnd freunds-  
lich vermercken vnd auffnehmen.

Dieselben E. Ehrnv. Ehrsam. Fürsicht. Weißhei-  
ten/vnd euch die ganze Burger schafft/sampt allen den  
eweren / hiemit also dem Allmächtigen zu gnaden vnd  
aller zeitlicher vñ ewiger Wolsahrt von Herzen tref-  
lich beschlend. Geschrieben zu Heidelberg den 20. Au-  
gusti. Anno 1591.

E. Ehrnv. Fürsicht.  
Weißheiten/

Vnd ewer/

Dienst vnd Freunde  
williger/

Mary zum Lamb/D.

Es ist





**I**st in Warheit wol zu erbarmen vnd  
höchlich zubeweynen / daß der leydige Teuffel/  
die schöne tröstliche Lehre/von den heiligen Sa-  
cramenten (an welche er daß sich gleich anfangs  
gemacht/ vnd es damit an vnseren ersten Eltern  
im Paradiß versucht hat) in der Christlichen  
Kirchen/ darinnen sie von Christo vñ den Aposteln hero eine lanqe  
zeit / rein vñnd vnverfälscht blieben/ durch den Römischen Antis-  
christ geändert vnd verkehret hat.

Aber viel mehr zuverwundern/vnd mit schmerzen zubeflagen  
ist es/daß heut zu tag/in vnd bey dem hellen klaren Licht des heiligs-  
gen Euangelij/die jenigen so sich nach demselben nennen/ auch in  
andern Religionspuncten von dem Papstthumb außgetreten/  
vñnd von anderen für sonderlich außbündige Christen angesehen  
vnd gehalten seyn wollen/ in solchem dem Papstthumb starck bey-  
pflichten/auch dieselbige Päpstliche gewel vñnd Abergläubische  
Ppsthumb / ohne grund Göttlicher Schrift behaupten vñnd vers-  
setzen/dermassen/daß sie darüber auch ihre Christliche Muthes  
der/die denselben wider das außdrückliche wort G Dttes vñnd ihre  
Gewissen/nicht ebenmäßig bepfall thun wollen/können/noch sol-  
len/als Verfälscher des Testaments Christi/Sectirer/vñnd sol-  
che Leuth / welche den Türcken vñnd Nachristen gleich/ ja auch  
noch wol ärger/als dieselbe zu schätzen seyen/ außschreyen/ lästern  
vñnd verdammen.

Derowegen vñnd zu rettung der Warheit/ vñnd frommer  
Leuth vñnschuldt/will die noth Christlicher lieb erfordern / einfals-  
tig vñnd doch mit grunde zuerweisen vñnd darzuthun / daß eben sie  
selbs die jehigen seyen/die dem Herren Christo sein Testament ans

dern/ auch die ganze ordnung vnnnd eynsazung seines heiligen Abendmals/ durchauß/ beyde in den Ceremonien/ vnd in der Lehr verkehren/ vñ also in diesem Handel es mehr mit dem Römischen Antichrist/ als mit dem HErrn Christo halten.

Dann ob sie schon viel vnd hefftig schreyen/ auch stetts vnd ohne vnderlaß auff die helle/ klare/ dürre/ truckene/ außirückliche wort der Ordnung vnnnd Eynsazung des Abendmals sich berufen/ vñ fürgeben/ daß sie bey denselben einfältig bleiben/ auch jnen stracks vnnnd richtig/ wie sie lauten/ glauben: So befindet sich es doch im grundt der Warheit geradt das Widerspiel/ vnd daß solche Leuth/ in dem sie durch einen verkehrten eiser/ einfällig glauben wollen/ sich selbst zwifach betriegen/ auch andere verwirren/ vnd im Irthumb auff halten.

Sintemal bewust vnd vnlaugbar ist/ daß in den heiligen Sacramenten/ vnd derselben Eynsazungen fürnemlich zwey ding zu bedencken seynd/ Als nemlich/ des HErrn Christi befehl/ von der eusserlichen action vnnnd Ceremonien, was wir nemblich thun sollen/ vnnnd dann seine gnädige Verheißung/ was er gegen vns thun wolle.

Als im heiligen Tauff lautet der befehl des HErrn also/ Matth. am 28. vnd Marci am 16. Capit. Gehet hin in alle Welt/ vnnnd lehret alle Völcker/ vnnnd täuffet sie in dem Namen des Vaters/ des Sohns/ vñ des heiligen Geistes: Die verheißung aber ist diese/ Wer glaubt vnd getaufft wirdt/ der wirdt selig werden.

Vnd in der Eynsazung des Abendmals ist diß der befehl des HErrn/ darinnen auch die Ceremonien begriffen seynd/ Vnser Herr Iesus in der nacht da er verrathen ward/ Nam er das Brot/ dancket vnd brachs/ vnd gabs seinen Jüngern vnd sprach: Nemet esset/ &c. Folgendes/ Desselben gleichen auch den Kelch/ nach dem Abendmal vnnnd sprach:

ſprach: Trincket alle darauff. Die verheiffung aber in dieſer Einſagung lautet alſo/ Erſtlich vom Brod: Das iſt mein Leib der für euch gegeben/ oder wie der Apoſtel Paulus in der 1. zum Corint. am 11. ſagt/ der für euch gebrochen wirdt: vnd darnach vom Kelch: Dieſer Kelch iſt das newe Teſtament in meinem Blut.

Nun bleiben aber ſie/ die Lutheraner/ nicht bey ſolchem beſelch deß Herren/ viel weniger behalten ſie ſeine Verheiffung richtig wie ſie an jr ſelbs lauter.

Dann ob wol deß erſten Sacraments deß Tauffs halben/ ſo viel in dem ſelben den beſelch vnnnd die Ceremonien betrifft/ kein ſonderlicher ſtreit vnd mangel iſt/ Sie auch nicht erhalten können/ noch feſtlich fürgeben/ oder alſo grob ſich mercken laſſen dürfen/ daß im heiligen Tauff/ entweder das euſſerli: hi:rdiſch Element/ nemlich das Waſſer/ in das Blut deß Herren Chriſti/ weſentlich verwandelt/ oder aber daß das Blut in vnnnd vnter dem Waſſer verborgen/ oder in das Waſſer eingegloſſen/ vnd mit demſelben vermiſcht vnd vermengt ſey: So ſeyndt ſie doch ſonſt in der Lehre dieſes Sacraments nit richtig/ In dem ſie faſt auß lauterm truh/ ſchier wider in das Papſthumb fallen/ vnnnd wollen (wie in ihrem Catechiſmo außdrücklich ſtehet) daß die Tauff würcke vergeltung der Sünden/erlöſe vom Todt vnnnd Teuffel/ vnnnd gebe die ewige Seligkeit/ allen die es glauben/ ja daß ſie ein gnadenreiches Waſſer deß lebens/ vnnnd wie ſerner D. Luther ſchreibt/ in ſeiner Hauſtpoſtill/ in der Predig von der Tauff Chriſti/ ein ſolches Waſſer ſey ( wie ſeine eigne Wort da ſelbſt lauten ) welches die Sünd/ den Todt vnd alles Vnglück hinweg nimbt/ vnnnd vnſ in Himmel vnnnd zum ewigen Leben hilfft/ daß auch darauff alſo ein köſtliches Zuckerwaſſer Aromaticum vnd Apotec worden ſey/ da Gott ſich ſelbs eyngemengert hab: Weil aber Gott ein Gott deß lebens/ vnd nunmehr in dieſem Waſſer ſey/ ſo müſſe es ja das rechte Aqua vitæ ſeyn/ das den Todt vnd die Helle vertreibt vnd ewigſelig macht.

Damit sie dann also auch zugleich die Göttliche gnädige verheißung / von abwaschung der Sünden / vnnnd der Wärges burt gänzlich umbstossen vnnnd verkehren / da sie nemlich die innerliche himmelische Gab / in das eusserliche jrdische Element eynschliessen / vnd solche Krafft vnnnd Wirkung dem Lauffwasser zuschreiben.

Weiln aber allen Rechtgläubigen Christen auß GOTTes wort bekannt / Daß allein das Blut Jesu Christi / vnd der heilige Geist vns reinige von allen vnsern Sünden / in der 1. Johan. am 1. vnd in der 1. zun Corinth. am 6. Cap. vnd die Lauff / als ein sichtbares heiliges göttliches Warzeichen vnnnd Sigel / vns dasselbige bestätigt / vnd gewiß versichert: So ist vnvonnöhten / auch gegenwertigem Fürhaben nicht gemäß / mit dieser groben / vngesheuwren / irigen meynung sich lang auffzuhalten / oder dieselbige weitlaufftig abzuleinen / als die an ihr selbstn ganz nichtig / falsch vnd vngerimbt ist.

Soll demnach von dem jenigen allein / darumb jetzt fürnemlich der Streit ist / alhie gehandelt / vnnnd klärlich vor Augen gestellt werden / daß die genannte Lutherischen / in der heylsamen Ordnung vnd Einsakung des Abendmals Christi / kein einziges wortlein ganz vnnnd unverfälscht behalten: Sondern beyde die Ceremonien vnnnd Lehr dieses hochwürdigen Sacraments / mit dem Römischen Papyt verkehren vnnnd gänzlich vernichten / inmassen ein solches zu thun ohne das nicht schwer / vñ für sich selbst klar am tag ist.

Dann es hat der getreue Herr vnnnd Heyland Jesus Christus / in stiftung vnd einsakung seines heiligen Abendmals / Brot vnd Wein / ja gemeine Speiß / vnd solchs Brot gebraucht / wie es damals in haltung des Osterfests gebräuchlich / vnnnd von Gott im 2. Buch Moysi am 12. Cap. gebotten ware.

Welches zwar er als ein weiser Gott / nicht ohn gefehr / vnd hohe wichtige vrsachen gethan hat / diweil er sonst auch wol Fleisch vom Osterlamb / oder anders / so er vnd seine Jünger das  
mala

mals auff dem Tiſch gehabt/nemmen/vnd zu dieſer ſeiner Stiſſung hette brauchen können.

Er hat aber (wie gemeldt) Brot vnnnd Wein genommen/Damit anzuzeigen/daß gleich wie nichts tauglichers vnd bequemes iſt zu erhaltung deß zeitlichen Lebens / als das rechte natürliche Speißbrot / dar durch der Menſch an ſeinem Leib genchret vnd geſpeiſet/deſſen er auch nimmer vberdrüſſig wirdt/ da ihm ſchon alle andere Speiſen erleyden ſolten/ ja ehe aller anderer Speiſen/ als deß Brots/zu erhaltung ſeines Lebens manglen vnd entrahten kan: Vnd gleich wie der Wein/ der von durſt matten vnd verſchmachten Menſchen / labet / erfriſchet vnnnd erquicket / alſo ſey auch ſein deß HERRN Chriſti gecreuzigter Leib / vnd ſein vergoßenes Blut/ damit vnd dadurch er vns mit ſeinem Himmlischen Vatter verſonet/vollkommene vergebung aller vnſerer Sünden/wahre Gerechtigkeit/vnd das ewige Leben/ verdient vnd zuwegen gebracht hat/das rechte Himmelsbrot/ja die wahre Speiß vnd der wahre Tranck/dar durch vnſere von wegen der Sünden hungerige/dürſtige/matte/vnd ganz verſchmachte Seelen/zum ewigen Leben erquicket/geſpeiſet/getrâncket vnd erhalten werden.

Hingegen/ ſo nemmen ſie die Lutheraner nicht Brot / ſondern Oſtien/welche nicht recht Brot/ſonder nur ein ſchaum vom Brot/ohngeachte ſie von Weel gemacht ſeynd : dann auch wol andere ding auß Weel gemacht werden / die darumb nicht Brot ſeynd/noch Brot genannt werden können. So ſtillen vnd löſſen auch ſolche Oſtien den Hunger nicht/vnd müſte man der oſelben viel eſſen/ ehe man ſatt darvon werden köndte/wolcher würde jemand/da er deren viel zu ſich nemmen ſolte/franck / als darvon geſättiget werden.

Welches dann/wie die Historien aufweiſen/ nirgends onß als vom Römischen Antichriſt herrühret. Dann nach dem zeit der Apoſteln / vnnnd nach ihnen in der erſten Kirchen/die ſchlechte vnd einfältige Ordnung deß HERRN Chriſti bey dem Abendmal/in maſſen ſie ſeine Jünger von ihm empfangen hatten/ behalten vnd gebraucht worden war/ biß vmb das Jahr nach



der geburt Christi 115. Da hat der Römische Papsst Alexander/ der Erste dieses nahmens/ vnd siebende in der zohl/ auß eigenem guldüncken geordnet/ daß man forthin nicht mehr gemein Tisch oder gesäuert Brot bey dem Abendmal brauchen/ sondern ein besonder vngesäuert Brot darzu backen/ auch den Wein nicht mehr lauter trincken/ sondern mit Wasser vermischen sollte. Dann nach dem anfänglich ein gute zeitlang in der Kirchen gebräuchlich gewesen/ wie Tertullianus schreibet/ daß die Christen auß ihren Häusern/ Brot zum brauch des Abendmals in die Gemein gebracht/ darvon man so viel von nöhten gewesen/ darzu gebraucht/ vnnnd das vbrige den Armen außgetheilt/ ist es nach gehens dahin gerathen/ daß man Weel auß jedem Haus genommen/ vnnnd ein grosses Brot auß demselben gebacken/ darvon man das Nachmal gehalten/ wie darvon schreibet Honorius in Gemma Animæ im 1. Buch am 66. Capit. Als aber die Kirche in der Anzahl sich gemehret/ vnd darægen in der Heiligkeit vnd Gottseligkeit (wie ermeldter Honorius sagt) abgenommen/ vnd den Papssten die Stiftung des einfältigen vnnnd armen Christi zu finden angefangen/ auch sie ihnen leichtlich die Rechnung machen mögen/ daß sich die Leuth in die länge nit bereden lassen würden/ daß das Brot/ welches der gemein Mann selbst gebacken/ vnnnd in ihren Häusern zu gemeinem Tischbrot brauchten/ selbst wesentlich der Leib vnd Fleisch Christi were/ haben sie/ jrer Transsubstantiation oder Verwandlung einen besseren Stein zu setzen/ acordes met/ daß das Brot zum Abendmal in anderer vnnnd eines Denarij oder Groschen gestalt sollte gemacht werden/ vnnnd daß das Votel an statt des Weels für ohin Gelt geben/ vñ sich also erinnern sollte/ daß Christus vmb dreissig Groschen oder Silberling verkauft worden/ da doch der Herr Christus sein heiliges Abendmal/ nicht zum Sacrament solcher Verrähterij/ sondern seines am Stamme des Creuzes für vnser Sünden auffgeopfferten Leibs vnd vergossenen Bluts verordnet vnd eingesetzt/ wiewol die selbige in alle weg zu befürderung vnser Erlösung gedient/ vnnnd der Herr auch sie darzu gebraucht hat.



Vnd diß ſind alſo die runden kleine vnd ſehr dünne Oſtien/ welche nachmals Gregorius Magnus ein gelehrter Papſt/ deß namens der Erſte/ vnd in der Zahl der 66. im 4. Buch Dialogorum, Panes Numularios, das iſt ſolche Brötlein/ die eines Groſchen oder Pfennings geſtalt haben/ vnnnd Minutias numulariarum oblationum genennet/ vnnnd darbey geklagt hat/ daß man ohnbillich in dieſem die ordnung Chriſti/ vnnnd den Gebrauch der alten Kirchen fallen laſſen vnd geändert habe.

Dieſe Oſtien aber hat folgendes im Jar ein Tauſent zweyhundert nach der geburt Chriſti/ der Papſt Honoratus, damit der Handel je Glaubwürdiger gemacht würde/ daß ein Leiblein ſo klein darunter verborgen were/ mit dem Crucifix bezeichnet/ daß alſo immer eine Abgötterey der andern die Handt gebotten/ vnd Chriſti ordnungen in veracht/ vnd abgang gerahten.

Darnach ſo hat der Herr Chriſtus das Brot gebrochen/ vnd daſſelbe gleichſals nicht ohn vrsach: ſintemal er damit lehren vnd für Augen ſtellen hat wollen/ ſeinen warhafftigen Todt/ vnd daß gleich wie das Brot in ſtücke gebrochen/ alſo auch durch den Todt ſein Leib vnd Seel gleichſam von einander gebrochen/ getrennet vnd abgeſondert/ auch er alſo durch ſeinen Todt/ vnſeren Secken/ die rechte wahre Speiß zum ewigen Leben worden ſey: Dann gleich wie ein Brot das ganz vnzertheilt/ vnnnd vngebrochen/ oder vnzerſchnitten bleibt/ niemants ſpeiſen/ nehren/ oder ſättigen kan: Alſo köndte vns auch der Leib Chriſti nichts nützen/ wann er nicht durch den Todt von der Seelen abgeſondert vnnnd warhafftig geſtorben were: ſintemal allein in dem Todt vnd der Auferſtehung vnſers heylands Jeſu Chriſti/ vnſer heyl vnd ewige Seligkeit beſtehet.

Sie aber die Lutherauer vnderlaſſen das Brotbrechen/ vnd weichen den Communicanten die Oſtien ganz: Welches auch inſonderlichs Antichriſtiſch Weiſerſtücklein iſt. Dañ nach dem die Oſtien eingeführt geweſen/ da iſt auch das Brotbrechen geſallen/ wider die ordnung Chriſti vnd der Apoſtoliſchen Kirchen/ wie zu ſehen iſt in expositione ordinis Romani, das iſt in der

erklärung der Römischen Kirchenordnung / im ersten Buch am 16. Cap. Da also stehet: Wir haben zwar gehört / daß sich etliche zu vnsern zeiten verwundern / daß die Römische Kirchenordnung gebiete / daß der Leib Christi (das ist das Brot / welches der Leib Christi genennet wirdt) gebrochen werde / gleich als ob sie nicht gelesen / oder vergessen hetten / das im Euangelio geschrieben stehet / daß der Herr Iesus das Brot genommen / gesegnet vnd gebrochen / es seinen Jüngeren gegeben vnd gesprochen hat / Nemet esset.

So liestet man auch in den Geschichten der Aposteln / daß die erste Kirche in der Lehre der Aposteln einmütig verharret / vnd dem Brotbrechen vnd dem Gebet obgelegen seye.

Zum dritten / hat der Herr Christus das gebrochene Brot seinen Jüngern in die Hände gegeben / sie es nehmen vnd essen lassen: damit anzuzeigen / daß wann er sich / seinen gecreuzigten Leib vnd vergossenes Blut / nicht selbst darreiche / vnd durch krafft / vñ Wirkung seines heiligen Geistes vns damit an vnseren Seelen zum ewigen Leben speise vnd erhalte / wir auch durch einen wahren Glauben (welcher die Hand vnd der Mund der Seelen ist) vns dasselbige nicht zueignen / vnd vns dessen nit theilhaftig machen / daß es alles vmbsonst vnd vergebens / auch solch seyn gecreuzigter Leib vnd vergossenes Blut vns nichts nutz sey.

Die Lutheraner aber geben die Ostien den Communicanten nicht in die Hände / sondern legen sie in den Mund / gleich als ob der Mund heiliger vnd besser were als die Hände / vnd die Hände vnreiner als der Mund / damit doch eben so viel vnd etwan mehr als mit den Händen gesündigt wirdt / wie Christus lehret Matth. am 15. Cap.

Das dann auch vom Papstthumb seinen vrsprung hat. Das im Jar nach der geburt Christi 615. ist im Concilio Roto-

magenß, das iſt/ in der verſammlung deß Pappſts vnnnd ſeines geſchmierten hauſſens zu Rouan in Franckreich gehalten/ verboten worden daß man den Leyen beyde Mann vnnnd Weib/ das Brod nicht mehr ſolle in die Hände geben/ wie es zuvor von der Apoſtelzeiten an bräuchlich geweſen: dieweil dieſe ding viel zu heilig ſeyl/ als daß ſie von denen ſo nicht geweyhet angegriffen werden ſolten.

Endlich vnd fürs vierdte/ ſo hat der Herr Chriſtus die Jünger heiffen eſſen das Brod/ wie ſolches auß den vorgehenden wortern anmußig zu ſehen iſt: Sie aber ziehet daſſelbe eſſen auff den Leib deß Herrn/ als ob er auch mit dem leiblichen Mund gleich wie das Brod könte geſſen vnd genoſſen werden. Denn ob wol Chriſtus ſeinen Glaubigen in rechtem brauch ſeines Abendmals/ nicht als ein Brod für den Leib/ ſondern auch ſein Fleiſch zur ſpeiße der Seelen zum ewigen Lebē zu eſſen giebet/ ſo iſt doch viel ein anders eſſen deß Brots/ welches mit dem Mund geſchicht/ vnd durch das wortlein Eſſen befohlen/ vñ ein anders eſſen deß Fleiſches Chriſti/ welches durch das eußerliche eſſen deß Brots verſiegelt wirdt.

Vnnnd dieſes ſo viel die Veränderung deß beſelchs Chriſti vnd der Ceremonien deß Abendmals anlangt.

Betreffend nun die Verheiffung vnd die Lehre/ verhellte es ſich damit ebenmäßiig: Dann für die Wort/ Das iſt/ ſagen ſie/ In/ mit/ vnd vnter dem iſt/ welches aber gar vngleiche reden ſeynde.

Nem für das wort mein Leib/ das iſt/ mein wahrer weſentlicher/ natürlicher/ ſichtbarer Leib/ welchen auch die Articul deß Chriſtlichen Glaubens zeigen vnd bekennen/ darauff dann als lebend jede Chriſten der heiligen Dreyeinigkeit in ihrem Taufſ gelobt vnd geſchworen haben/ darbey ſie auch ſo lieb jhnen ihr ewiges Heyl vnd Seligkeit/ iſt beſtändig zu bleiben ſchuldig vnd verpflichtet ſeynd/ lehren vnd dichten ſie einen vnſichtbaren/ vbernatürlichen/ vnbegreiflichen Leib.

Für die wörter/ Der für euch gegeben iſt/ lehren/ ſingen vñ ſagen ſie/ Der im Brod ſo klein verborgen iſt/ vnd Geiſtlicher/

das ist ( wie sie es deuten ) vbernatürlicher / vnbegreiflicher  
weiß / aber jedoch mit dem leiblichen Mund / beyde von Glaub-  
igen vnd Unglaubigen empfangen / geessen vnd genossen wurde.  
Also auch / daß / wie Doct. Johan Marbach gewesener Kirchen-  
diener zu Strassburg / in seiner Erklärung vber das 15. Cap. der 1.  
Epistel Pauli an die Corinthher schreibt vñ fraget / Was der Leib  
Christi nicht in vnsern Leib kommen solte / woher dann vnser  
Fleisch vñ Blut die krafft vnd das vermögen nemmen solte / zum  
künfftigen ewigen Leben auffzuerstehen?

Aber / O lieber Gott / ist es nit ein grosse schande / vnd er-  
bärmlicher Jamer / daß bey diesem hellen liecht des Euangelij/  
von denen Leuthen / die sonst für so grosse Doctores vñnd die  
fürtrefflichste Liechter der Welt vor allen angesehen seyn wollen/  
so abscheuwliche vngewore gedicht auff die Bahn gebracht wer-  
den sollen?

Dann lieber / Ist ihm nicht also / daß wie der Apostel Paulus  
lehret zum Rom. am 8. vñnd in der ersten zum Corinthern am 6.  
Capit. daß der / welcher den Herren Christum von den todten hat  
aufferweckt / auch vnser sterbliche Leiber von den todten auff-  
wecken / vñnd sie durch seine Krafft vnd seinen in vns wohnenden  
Geist lebendig machen / vnd wie Johannis am 6. sieht / Wer an  
ihn glaubet / denselben er am Jüngstentag aufferwecken wird?

Allda dann zwar gar nicht dem leiblichen mündlichen Fleisch  
essen / sondern allein dem heiligen verdienst Christi / vnd der krafft  
seines Geistes / durch welchen er in vns wohnet vnd bleibet / in der  
1. Johan. am 3. Cap. die aufferstehung vnseres Fleisches zur ewi-  
gen himmlischen freude vnd Seligkeit zugeschrieben wirdt.

Ist nun dieses nicht ein grober Capernaitischer Irthumb/  
ja auch noch viel ein gröberer Verstand / als der armen vnver-  
ständigen Capernaiten ihrer war / welche zwar ob solchem münd-  
lichen Essen des Herren Christi fleisch ein abscheuwen trugen / da  
hingegen diese große Meister in Israel dieselbige bestättigen / ver-  
setzen / vñnd auß allen ihren kräfften zuvertheidigen sich vn-  
derstehens

Berner da Christus sagt / solches thut zu meiner gedächtnuß / vnd der Apostel Paulus vermahnet den Todt des Herren zu verkündigen / biß daß er komt: setzen vnd lehren sie die Lutheraner / Solches thut vnnnd empfahet zu vergebung ewiger Sünden / Suchen also ( wie auch hie oben vom Lauffwasser angezeigt / ) die Seligkeit in den wercken / vnd stellen die vergebung der Sünden in den cussertlichen gebrauch des Abendmals.

Es rühret aber diese verkehrung vnd verfälschung der verheißung vnnnd Lehr vom Nachtmal / welche wie auß den Schrifften der alten Vätter / vnnnd dem ganzen einheiligen Consens der alten Christlichen Kirchen zu sehen ist / in die 700. Jar vnzusehrlich rein vnnnd vnuerfälscht geblieben ist ) auch von dem Römischen Antichristenthumb her.

Dann vmb das Jahr nach der Geburt Christi 735. ohngefahr / hat gelebt Iohannes Damascenus Presbyter, welchen die Papiste so hoch erhaben / daß sie ihn principem Theologorum, das ist einen Fürsten Göttlicher Lehrer genannt / der wider die Lehre aller heiligen Vätter fürgeben hat / daß im Nachtmal ein wunderwerck vnd eine vnaussprechliche verwandlung Brots vñ Weins in den Leib Christi geschehe / vnnnd also das Brot ein vergötteter Leib werde.

Demselben zu wider hat Iohannes Mailrosius Scotus auß der alten Vätter schrifften Sprüche zusammen aetragen in ein Buch / darinnen durchaus der gesunde Lehr Augustini nachfolgt / vnd beweiset daß der handel des Herren Nachtmals geistlich sey / vnd geistlich müsse verstanden werden.

Im Jar nach der Geburt Christi 820. hat gelebt vnd geschrieben Rabanus Magnentius Maurus, welcher erstlich ein Abbt zu Fulda gewesen / darnach zum Bischoff zu Meyns erwöhlet worden ist / der hat die Lehr Iohannis Scoti bestätigt vnnnd gut geheißen / auch erwiesen mit gutem Grundt außführlich / daß der handel vom H. Abendmal ein geistlich Werck seye.

Vmb das Jahr aber Christi 900. da ist der Streit recht an-



gegangen: Dann als Paschasius Ratbertus Abbt zu Corbey ein Buch auß der Vätter schrifftten zusammen getragen/ in welchem er die grobe Leibliche meynung / von dem Göttlichen geheimnuß bestätigen vnd beweisen wollen/ daß der Leib Christi im Nachmal leiblich gegenwertig sey vnd genossen werde/ da haben sich die Gelehrten getrennet/ vñ deren etliche der Altvätter Lehr/ welche Scotus vertheidiat: vñ hingegen andere/ sonderlich aber die Römische Kirch/ dem Damasceno vnd Paschasio sich anhängig gemacht.

Welcher streit auff die Anderthalbhundert Jar gewehret hat/ biß Lanfrancus ein Italianer von Pauis/ Bischoff zu Cantuarien in Engelland/ vnd Berengarius ein Frankos/ mit disputiren an einander erwachsen/ vnd hat Lanfrancus Paschasij meynung behaupten vnd verfechen wollen, Berengarius aber die Lehr der alten Apostolischen Kirchen vertheidiget.

Damals hat sich Papsi Leo der neunnde diß Namens darein geschlagen/ vnd im Concilio Vercellensi, vmb das Jar nach Christi Geburt 1053. daß Buch Iohannis Scoti, vñnd die Lehr des Berengarij verdampt/ dagegen die Lehr Lanfranci für billich vnd recht erkandt.

Diweil aber ermeldter Papsi / durch solchs sein Decret, diese Lehr nicht kondte dämpffen: Sintemal Berengarius mit deroselben in Franckreich fortfuhre / so wurde nachmals vmb das Jar Christi 1058 von dem Papsi Nicolao dem zweyten diß Namens ein ander Concilium zu Rom gehalten / dahin Berengarius citirt/ vñ nach dem er dahin kommen / zum schändlichen fürgeschriebenen Wiederruff solcher seiner Lehr / auß menschlicher Schwachheit gezwungen wurde / vnd bekennen muste/ daß Brod vñnd Wein auff dem Altar/ nach der Consecration, nicht allein ein Sacrament / sonder der wahre Leib vñnd Blut vnser Herrn Christi seye/ vñnd empfindlich/ nicht nur Sacraments weis/ sondern warhafftig mit der that / von der Priester händen gehandelt/ gebrochen/ vnd mit der glaubigen Zänen zermahlet werde: Welches dann D. Luthers in seiner grossen Confession an diesem Papsi sehr rühmet/ vñnd wündschet/ daß alle Papsi so fromm wes



ren/als (ſeines erachtens) dieſer Nicolaus geweſen iſt.

Nach ſolchem iſt dieſe vngeheure Lehr von dem Abendmal deß Herren in der Römischen Kirchen für die rechte vnd reine Lehr gehalten / vnd im Jar nach der Geburt Chriſti 1079. zu Rom / durch ein ander Concilium, vom Pappi Gregorio deß Namens dem ſiebenden / zuvor Hildenbrand genandt / von neuwem beſtätigt vnd bekräftigt worden.

Vmb das Jar nach Chriſti Geburt 1215. hat der Pappi Innocentius der dritt deß Namens dieſem langwirigen Handel vñ Streit vom Nachtmal ein ende zu machen vnderſtanden / vnd ein groſſes Concilium zu Rom gehalten / in dem ſelben die Tranſubſtantiation oder verwandlung deß Brots vñnd Weins / in den Leib vnd in das blut Chriſti / welches ein ſtütze vñnd Pfeiler iſt der leiblichen Gegenwertigkeit vnd mündlichen Nieſung deß Leibs vñ Bluts Chriſti / vnter der geſtalt Brots vñnd Weins / mit groſſem Gepräng für einen / (vñnd alſo den dreizehenden) Articul deß Glaubens zu halten öffentlich decretirt vñnd beſchloſſen.

Vñnd auß ſolchem groben Irthumb deß Pappſts von der Tranſubſtantiation, haben nachmals etliche Schullehrer den anderen Irthumb de Conſubſtantiatione oder die räumliche einſchließung vñnd vermischung deß Leibs vñ Bluts Chriſti / *I N M I T V N D V N T E R* dem Brot vñ Wein deß Abendsmals / geſpinnen / alſo daß ſie das Fundament ſolches groben Irthumbs / nemlich die leibliche Gegenwertigkeit / vñnd mündliche Nieſung deß Leibs vñnd Bluts Chriſti / in / mit / vñnd vnter dem Brot vñ Wein / vertheidigt vñnd behalten haben.

Vñder welchen fürnemlich geweſen iſt Petrus de Aliaco Cardinal von Cammerich / von dem D. Martin Luther ſolche meynung von dem Leiblichen vñnd Mündlichen eſſen deß Leibs Chriſti / in / mit / vñnd vnter dem Brot / entſchnet vñnd genommen hat / wie mit ſeiner eigenen Handſchrift / die noch an einem vornemen Ort vorhanden iſt / zuerweiſen / auch er ein ſolches ſelbſt vngescheucht bekennet in ſeinem Buch Von der Dabylöſchen gefängnuß.

Vñnd

Was dieweil die mehr gemeldte Lutherischen bey dem andern stück des Abendmals/eben wie im ersten die Consubstantiationē, oder Raumlliche einschließung behaupten/ vnd wollen daß im Kelch/oder in/mit/vnd vnter dem Wein des Kelchs/das wahre wesentliche Blut des Herzen Christi eingeschlossen vnd verfaßet sey/auch mehrertheils hefftig auff einen vergülten Kelch dringen/ vnd die Altaren ihnen dermassen belieben lassen /daß sie dieselben an vielen ertzen/ da sie schon außgeräumbt / vnnnd die erste Apostolische ordnung vnd eynfalt wider eingefürt / von neuem auffzuawen lassen: so ist hievon auch ein kurzer Bericht zu thun.

Was erstlich erscheinet auß der Einfassung des Abendmals/ daß der Herze Christus vom Kelch (so in Griechischer Spraaich ein Trinckgeschir genandt) saget / daß er seye das newe Testament in seinem Blut.

Nun ist aber das newe Testament des Herzen Christi anders nichts / als die Versöhnung mit G D t / in welcher sthet die gnädige verzeihung der Sünden/die wahre Gerechtigkeit/vnnnd das ewige Lebt/welches alles der Herze Christus durch sein Blut vergiessen vns erworben vnd zu wegen gebracht hat.

Derowegen dann/ob der Kelch entweder die verzeihung der Sünden/die Gerechtigkeit/das ewige Leben / vnd also der newe Bund selbst sey/oder solche Gnaden vnd Gaben im Kelch/ oder in/mit / vnnnd vnder dem Wein des Kelchs wesentlich verfaßet/eyngeschlossen vnd verborgen seyen/kan auch ein jeder geringwertigkündiger Christi vrtheilen.

Am anderen so meldet der Griechische Text / wie erst angezeigt / darinnen das newe Testament vhrsprünglich beschrieben worden /nur schlecht vnnnd einfältig von einem Trinckgeschir: in gemein/vnnnd zeigt darbey nicht an / wie dasselbige formiert/ob es ein Becher/Krauß/Kannt oder Krug / auch nicht ob es von Silber / Gold / Stein / Glas / oder auß einer anderen materie gemacht vnd zugericht gewesen seye.

Es hat aber auch der Römisch Antichrist die form des Kelchs erdacht / vnnnd in die Kirche eyngeführt / als nemlich Zephori-

aus der 16. Römische Pappst/nach dem zuvor hülserne Geschir  
in brauch gewesen/ hat er erstlich im Jar nach der Geburt Chri  
sti 202. einen gläsernen Kelch zum gebrauch des Abendmals ver  
ordnet: Darnach so hat Urbanus der Erste/ vnd in der Zahl der  
11. Pappst/im Jar nach Christi geburt 227. an statt der hülsernen  
und gläsern Kelch/ die zuvor in der Kirchen bey dem Abendmal  
in brauch gewesen/damit das Blut im Holz nicht eintrucknete/  
der in zerbrechlichen Gläseren nicht balde verschuttet würde/  
Silberne vnd Guldene Kelch gemacht/ auch die Paten/darauff  
die Ostien gelegt vnd consecrirt werden/ erdacht. Vnd seynd  
war etliche auß den alten frommen Lehrern/ mit solchem Pracht  
vnd vberschweif/ als der reinen Apostolischen eynfalt zu wieder/ aar  
nicht zu frieden gewesen: In massen dann auch der heilige Chri  
stianus runde saget/ Wann man des Herren Abendmal halte/  
wer es vnonnöthen/ daß man güldene Geschirz hette/ sondern  
guldene Herzen solt man haben.

Es schreibe auch eben auff diese meynung ein frommer alter  
Lehrer/ Daß es damals sehr wol in der Kirchen stunde/ da die Ges  
chirz in derselben noch hülsern/ vnd die Priester gülden waren/  
(nemlich ihrer reinen Lehr vnd vnsträflichen Christlichen wans  
deln halben) Nach dem es sich aber vmbgekehret/ vnd in der Kir  
chen die Geschirz gülden/ vnd die Priester hülsern worden/ (das  
ist/ von der reinen Apostolischen Lehr vnd Ordnung abgewichen/  
vnd in ein Gottloß ärgerlich Leben gerahten seynd) siehe es gar  
del in der Kirchen: Wie dann noch heut zu tag ein solches hell  
genug am Tag ligt/ vnd in der Römischen Antichristlichen Kir  
chen sich genugsam bescheinet.

Allhie ist auch nicht stillschweigend zu vmbgehen/ daß im  
Jar nach Christi Geburt 1415/ durch ein Concilium zu Cost  
gehalten/ der Teuffel erst recht ins Werck gerichtet hat/ das  
sich damit er etlich hundert Jahr zuvor war vmbgangen. Daß  
er wol selbst den damaln runde bekandt vnd geschrieben/ daß die  
heilige Beheymanuß in zweyerley gestalt zu empfangen/ von der  
reinen Kirchen auff die Glaubigen kommen sey: So haben sie  
D sich

sich doch nicht geschämbt / diese Göttliche einsagung des Herren Abendmals zu anderen / vnd den Gebrauch des Kelchs den Layen zuentziehen / vnd ihne allein den gesalbten Priestern zuzulassen. Welches auch folgendes im Jahr 1431. in dem Concilio zu Basel / wieder ihr eigen Pöpstlich Recht de consecratio. distinctio. 1. C. comperimus, da diese trennung für einen grossen Kirchenraub angezogen / von newem wider confirmirt vnd bestetiget ist worden / daher auch noch dieser zeit im Pöpstthumb den Layen / Mann vnd Weibspersonen / das Abendmal nur vnter einerley gestalt (wie sie es nennen) gereicht wirdt.

Zum dritten / die Altarien betreffent / ohngeacht daß Christus nach erfülltem Geseze vnd vollbrachten Opfer am Creutz / ein anders in der Kirchen angerichtet / vnd die Altar allein an die Orth gehören / da man Viehe schlacht / vnd mit Feuer opffert / So hat doch der Antichrist dieselben zu seinem abschewlichen verfluchten Mesopffer beyde auß dem alten Heydentumb / vnd dem Jüdischen Leuitischen Priestertumb entlehnet / vnd der Römische Pöpst Sixtus der ander diß Namens / vnd in der Zahl der filßß vnd zwänzigste / im Jar nach Christi Geburt 162. die selbigen an statt der Tische / darauff zuvor das Abendmal außgespendet ward / in die Kirchen eingeführt / vnd dargegen die Tische gänzlich außgemustert.

Also ist neben den Ceremonien / auch die ganze Lehr vom Abendmal des Herren Christi durchaus verfälscht / vnd seine heylsame Ordnung gestümmelt / zerrissen vnd verkehrt worden.

Darauff vnd ob erzehlten dann gnugsam zu erschen / wie richtig die jenigen / die sich der wort der Einsagung des heiligen Abendmals / so stark vnd hefftig rühmen / bey denselben vñ irem rechten Verstandt bleiben / auch daß sie in solchem mehr auß des leybigen Pöpsts verkehrte / verfälschte vnd gar gestümmelte / als des Herren Christi warhafftige / reine vnd richtige Ordnung sehen / vnd daran sich halten / wie ein jeder auch schlechter einfältiger Christ / da er nur das gefasste Vorvrtheil ablegen vnd hindan setzen will / ein solches leicht erkennen / vnd zugleich wolmercken wirdt

wird können / ob auch der Herr Christus / welcher zwar wichtig  
genug / ja die ewige Weisheit Gottes selber ist / solcher klugen Weis-  
heit und Verbesserer seiner heiligen Ordnung und Einsetzung  
vonnöthen gehabt habe.

Aber es will nichts desto weniger die blinde verstockte Welt /  
auch noch heut zu tag / bey dem hellen lichte des Euangelij / viel  
leicht durch den prächtigen scheinbaren betrug des Römischen  
Antichristi betört werden / als mit der cynsaltigen Wahrheit des  
frommen getreuen Heylands Christi / sich benützen lassen vnnnd  
zufrieden seyn.

Serner vnd demnach auch neben andern die Lu-  
therischen verwerffen / vnnnd bey außspendung oder reichung des  
Abendmals nicht gern dulden wollen die wort des heiligen Apo-  
stels Pauli in der ersten Epistel zum Corinth. am 10. Capit. Da  
es spricht / Das Brot das wir brechen ist das nicht die  
Gemeinschaft des Leibs Christi? Vnd der Kelch der  
dankagung / damit wir danken / ist er nicht die Ge-  
meinschaft des Bluts Christi? So ist hievon auch kürz-  
lich etwas zu handeln: vnnnd derohalben gewiß vnnnd vnwieders-  
prechlich wahr / daß solches nicht schlechte blosser Wort eines  
Menschen / wie etliche ohnverschämte fürgeben / sondern daß sie  
für des heiligen Geistes / vnd also auch des Herren Christi wort  
selber zu halten seyn. Dann ja der Apostel Paulus in der ersten  
zum Corinth. am 11. Capit. bezuget / Er hats von dem Herren  
empfangen / das er den Corinthern gegeben / so hat er / der außers-  
wählte Rüstzeug Gottes / so wol als die andern Aposteln vnnnd  
Jünger Christi den heiligen Geist gehabt / welcher das jenige / so  
ihme eingeben / von des Herren Christi seinem genommen / vnd  
hernach dem verheiß Christi Johan. am 15. Cap. in alle warheit  
geteilt hat.

Daß nun diese Leuth sich ob solchen Worten vermeyntlich  
büßern / im heiligen Abendmal keine Gemeinschaft zulassen /



oder je zum wenigsten ab solchen Worten vnder Erinnerung ein mißfallen tragen/ vnd daß man die Wort des Herren Christi/ **Das ist mein Leib/ das ist mein Blut/** bey auftheilung vnd darreichung der eusserlichen irdischen Elementen des Brots vnd Weins brauchen vnd sprechen soll/ haben wollen/ das ist kein gegebenes/ sonderen viel mehr ein muthwillig gesuchtes vnd selbst genommenes argernuß: zu diesem ende allein gerichtet/ damit sie in dem Aberglaubischen wahn vnd falschen irthumb/ daß nemlich/ wann dieselbige Wort gesprochen werden/ der Leib vnd das Blut Christi wesentlich in vnd vnter das Brot vnd den Wein des Abendmals kommen/ vnd folgendes also mit dem leiblichen Mund empfangen vnd genossen/ zu ihrem selbst schaden vnd ewigem verderben gestärket werden.

Es ist aber allhie die Frag/ ob auch ein Kirchendiener in darreichung des Brots vnd Weins beym Nachtmal/ mit fugen vnd warheits grundi zu den Communicanten also sagen könne/ **Nemmet hin vnd esset das ist mein Leib/ der für euch gegeben wirdt/ vnd/ Nemmet hin vnd trincket das ist mein Blut das für euch vergossen wirdt:** Ist ihme nicht also/ daß die Communicanten damit nicht zu frieden seyn/ vnd solche Wort viel mehr von des Kirchendieners selbs/ als von des Herren Christi Leib verstehn würden?

Der Herr Christus aber allein hat diese wort von seinem Leib vnd Blut/ welcher Leib damals noch nicht gecreuziget/ vnd welches Blut noch nicht vergossen war/ sondern erst hernacher gecreuziget vnd vergossen werden solte/ recht vnd warhafftig sagen können.

Zu dem er der Herr Christus eben dieselben wort/ nicht seiner Jünger jedem insonderheit widerholet/ oder sie zu ihrem jeden besonders gesprochen/ sondern in Gemeyn nur einmal zu ihnen allen gesagt hat/ **Nemmet esset:** Insonderheit aber zeuget der Euangelist Marcus am 14. Caput. daß der Herr Christus erst  
nach



nachdem ſeine Jünger ſchon alle auß dem Kelch getruncken hatten/ von demſelben geſagt/ Das iſt mein Blut deß newen Teſtaments/ das für euch vergoffen wirdt/ Oder wie der Euangeliß Lucas am 22. Cap. ſchreibet/ Das iſt der Kelch deß newen Teſtaments in meinem Blut/ vnnnd nicht in varrichtung deß Kelchs ſolche Wort zu ihnen geſprochen habe.

Über das/ ſo iſt auch noch vielen guten Leuthen bewußt/ daß D. Luther ſelbſten/ wann er das Abendmal zu Wittenberg gehalten/ bey außſpendung deſſelben zu den Cömunicanten gar kein Wort geſprochen/ ſonder nur zuvor die Eynſagung geſeſen vnd erklärt hat/ wie auch noch heutigs tags zu Franckfort am Mayn/ vnd an andern vnderſchiedlichen Orten mehr bräuchlich iſt: ſintmal in dieſem die Kirch ihre Freyheiten/ vnd ein ieder Ort ſeine beſondere Formulen hat. So iſts auch in der Churfürſtl. Pfalz Kirchenordnung erlaubt vnnnd zugelaffen/ die gemeldte wort deß Apoſtels Pauli/ oder andere dariñ/ vermeldte zugebrauchen/ bevorab in denen Gemeynen/ da die Leuth erbawet/ vnd der falſche Aberglaubische wahn vnd irthumb/ Daß nemlich/ wann die Wort geſprochen vnd gebraucht werden/ der weſentliche Leib vnd Blut Chriſti/ in vnd vnder dem Brot vñ Wein deß Abendsmals/ mit dem leiblichen Mund empfangen vnd genoſſen werde/ auß den hertzen der Communicanten geraumbt/ da ſonſten hierdurch die eynſältigen vnd vnverſtändigen Leuth in demſelben aufgehalten vnd beſtätiget werden.

Wann nun bey reichung deß Brodts vnnnd Weins im Abendmal die wort deß Herren Chriſti/ welche er ſelbſt geredt/ zu dem ende vnd in ſolchem verſtand/ wie obvermeldt/ nicht behalten noch gebraucht werden können/ ſondern an ſtatt deroſelben/ im ſolman je etwas darbey geſprochen haben will/ nothwendig anders Wort gebraucht werden müſſen/ die nicht Chriſti/ ſondern nur Menſchen wort ſeynd/ Warumb wolte man dann nicht viel lieber vnnnd eher die wort deß Apoſtels Pauli/ welche/ als hievor

angezeigt / des heiligen Geistes vnd also des Herren Christi selb  
wort seynd / brauchen?

Ist sich derothalben höchlich zu verwundern / daß jemand  
der ein Christ seyn will / sich an den Worten des heiligen Geistes  
vnd dem jenigen so billich sein höchster Trost vnnnd größte freude  
seyn solte / also mutwillig vnnnd freuentlich zu ärgern anmassen  
darff.

Dann lieber ist ihme nicht also / daß in dem vnser eufferstes  
Elend vnnnd höchstes Verderben / ja ewige Verdammus stehet /  
daß wir nemblich durch vnsern Ungehorsam vnd Abfall von der  
seligen Gemeinnschafft Gottes vnnnd aller seiner heiligen abgeson  
dert / außgeschlossen / vnnnd in die vn selige verfluchte Gemeyn  
schafft des leydigen Teuffels vnd aller verdammten Geister kom  
men vnd gerathen seynd? Hingegen aber diß vnser einiger vnnnd  
höchster Trost ist / darinn alle vnser Wolsahrt vnd Seligkeit be  
stehet / daß der liebe getrewe Herr vnd Heyland Jesus Christus /  
durch seinen Todt vñ Blutvergießen / vns mit seinem hüfflichen  
Vatter widerumb versöhnet / auß dem Todt in das Leben ge  
bracht / vnd vns die selige Gemeinnschafft erlangt vnnnd zu wegen  
gebracht hat / also daß wir mit ihme wahren Gott vnd wahren  
Menschen / vnserem IMMANUEL, ein wahre / lebendige  
Gemeinnschafft / vnd an allen seinen vns erworbenen Himmels  
schen Gütern vnd Schätzen theil haben? Daher wir auch in den  
Articulen des allgemeynen Christlichen glaubens bekennen vnnnd  
glauben / eine Gemeinnschafft der Heiligen / vnd zugleich auch mit  
des Heylands Christi selbs / als des Haupts aller Heiligen vnnnd  
Glaubigen: Dero wegen dann der heilige Johannes in seiner  
ersten Epistel am 1. Cap. also schreibet: Was wir gesehen vnd  
gehöret haben / das verkündigen wir euch / auff daß  
auch ihr mit vns Gemeinnschafft habt / vnd vnser Ge  
meinnschafft sey mit dem Vatter / vnd seinem Sohn Je  
su Christo / auff daß ewere freude vollkommen sey.

Wor die Teuffel vnd Gottloſen wiſſen auch wol / daß der Herr Chriſtus ſeinen Leib in den Todt gegeben / vnnnd ſein Blut vergoſſen hat / weil ſie aber an ſolchem leiden / ſterben vnd Bluts vergoſſen weder Theil noch Gemeinſchafft haben / ſo müſſen ſie viel mehr darfür erzitteren / als daß ſie ſich deſſelben im wenigſten erſtrewen oder tröſten köndten.

Alſo auch wann jemandes ſchon lang wol wiſſ / daß dieſe oder jene Statt oder Gemeyn viel güter vnd freyheiten hat / aber kein Burger noch Gemeynsman in derofelben iſt / was hat er ſich deſſelben zugetröſten ? Oder was hilfft es einen / daß etwa er einander ſehr Reich vnnnd mit groſſem Gut begabet iſt / dauon er den geringſten Heller nicht zuverhoffen hat. Da aber einer in einer ſo hoch begüteten vnd gefreyten Statt oder Gemeyn Burger oder Wittgemeiner iſt / oder an deß Reichen gut auch theil vnnnd gemeinſchafft zu haben / gewiß vnd verſichert iſt / ſo wirdt er ſich ja eines ſolchen tröſten vnd höchlich erſtrewen.

Darumb dann billich niemands (er wölle dann lieber Gemeinſchafft haben mit dem leydigen Teuffel / als mit dem Herrn Chriſto) ſich an dieſen ſchönen tröſtlichen Worten deß heiligen Geiſtes (dardurch der rechte Nutz vnd Brauch deß heiligen Abendmals angezeigt vnd erklärt wirdt) ärgeren / ſondern viel mehr ein jeder Chriſt / das jenige ſo ſie lehren vnd aufweiſen / im Gebrauch deß heiligen Abendmals / durch wahren feſten Glauben ſhne ſelbſt zueignen / vnd ſich in ſolche gnädige verheißung mit rünſchließen ſoll.

Aber wann man im grundt erwegen vnd eigentlich betrachten will / was heut zu tag die Leuthe mehrtheils in dieſem gefaſten irigen Wahn / vnd vngegründter Meynung ſteiffe vnd auffhalte / ſo finden ſich fürnemblich dreyerley / jedoch ganz nütze behelff / vnd durchaus vnerhebliche Urſachen.

Dann die augenſcheinliche Erfahrung gibts / wann man ſolche Leuthe auß Gottes wort vnderrichtet / ihnen die Lehr erklärt / vnnnd ſie deß Irthums vberzeugt / bekennen ſie zwar rundt / daß ſie

sie dagegen nichts fürzubringen / haltens für recht / vnd Gottes wort durchauß gemäß / wolten sich aber vngern zu einer andern Religion begeben / sondern viel lieber bey dem alten Gebrauch vnd langer Gewonheit bleiben: wenden für / sie seyen je vnnnd allwegen von ihrer Jugend auff der Lutherischen meynung gewesen / in derselben Religion geboren vnnnd auffgezogen / auch von ihren Eltern / Schul / Lehrmeistern vnd Predigern / zu Haus / in Schulen / vnd ihrer Wanderschaft / mit allem ernst darauff gewiesen vnd darzu angehalten worden / gedencen dinnach darbey zuverharren / vnd fragen darneben / Ob dann ihre Eltern / Schul vnd Lehrmeister / sampt anderen die sie also angewiesen / vnd auch derselben meynung gewesen / vnrecht daran gethan / oder daruiff verdampft seyen? Item / wann sie vnrecht daran seyen / vnd nicht recht glauben / so wollen sie es denen zutreffen geben / vnd die jennigen es verantworten lassen / die sie also vnrecht gewiesen vnnnd gelehrt haben.

Geben also damit zuverstehen / daß sie vnder die Zahl deren gehören / von welchen der Keyser Iustinianus in der 146. Constitutione de legendis Scripturis, das ist / von lesung der heilige Schrift meldet / daß sie von Gottes wort gar nichts verstehn / sondern nur an dem blossen namen der Religion hangen / sich auff denselben als auff ein starcken Schilt vest verlassen / vnd meynen / daß die wahre erkandnuß Gottes vnd seines worts allein in den namen der Secten stehe.

Solchen Leuthen aber ist zu antworten / Erslich mit dem alten Martyrer Cypriano, der in Epistola ad Pompeium schreibet / Quod consuetudo sine veritate, vetustas est erroris: das ist / Daß ein alter Gebrauch ohne grundt vnnnd warheit / ein alter langherbrachter Irthumb / oder selbs das alte Herkommen deß Irthumbso sene: Vnnnd ferner ad lubaianum also: Frustra quidam qui ratione vincuntur, opponunt nobis consuetudinem, quasi consuetudo maior

maior sit veritate, das iſt/ Die ſenigen ſo mit grund vber-  
 ſenget werden/ halten vns vergebens für die lange ge-  
 wonheit/ gleich als ob die gewonheit gröſſer ſeye/ vnnnd  
 mehr gelten ſolte/ als die warheit. Item an einem ander-  
 orth: Non quia aliquando erratum eſt, ideo ſemper er-  
 randum eſt: das iſt/ Man ſoll darumb nicht allwegen ir-  
 ren/ weil man etwan geirret hat. So bringet vnnnd macht  
 auch der gemeyne Irthumb keinen brauch/ dem mañ der war-  
 heit zum Nachtheil folgen/ vnd ſich in ſo wichtigem Handel da-  
 mit für Gott entſchuldigen köndte.

Darnach daß dieſes keine erhebliche Urſach ſeye in dem  
 Irthumb zuverharren/ da man fürwendet/ daß man in demſel-  
 ben geboren vnd erzogen iſt: ſintemal alle Menſchen in Sünden  
 empfangen vnd geboren/ ja mit allem ihrem dichten vnd trachten  
 von Jugend auff gar verderbt vnd nichts nütz ſeyn: Es ſolget aber  
 darumb nicht/ daß man in Sünden verharren vnd ſtecken bleiben  
 ſolle. Also würde auch keinen Vnglaubigen/ der von Heyden/  
 Juden/ Türcken vnd anderen Vnchriſten geboren iſt/ ſolche ſei-  
 ne Geburt/ wann er vmb der oſelben willen im Vnglauben vnnnd  
 Irthumb verharren wolte/ entſchuldigen/ bevorab da ihme die  
 Warheit also hell/ wie dieſen Leuthen/ vnter Augen ſcheinen/ vnd  
 der geoffenbarte wille Gottes/ ſo klärlich auß ſeinem heiligen  
 Wort dargethan vnd zuverſtehen geben werden ſolte. Ferner/  
 ſo iſt in Gottes ſachen nicht auff die Menſchen/ was dieſelben gut  
 oder böß heißen/ vnd wie ſie vns lehren/ weiſen oder führen/ ſon-  
 dern allein auff den Allmächtigen Gott/ ſein heiliges ſeligmas  
 chendes Wort/ geoffenbarten willen/ vnd außdrücklichen beſelch  
 niſſen/ vnd demſelben zu folgen.

Es ſoll auch niemand ſo frech vnd vermessen ſeyn/ daß er  
 dem Allmächtigen Gott in ſeyn heymliches Gericht vnd verbors-  
 genes Urtheil zu greiffen/ vnd wer von vnſern Vordtern vers-  
 dumpt oder nicht/ zuerforſchen ſich anmaſſen wolte: ſondern viel  
 E mehr



mehr ein jeder Mensch / auff sich selbst / sein eigen thun vnd glauben (als dasjenige so er für sich allein verantworten / vnnnd dafür er für seine eigen Person wird Rechenschaft geben müssen) sehen / vnd gute achtung geben / daß er Rechtschaffen erfunden werde / vnnnd für Gottes Gericht bestehen möge. Dann ob wol vnser Voralteren in grosser Finsternuß vnd Irthumb nach gelegenheit der elenden Zeit gesteckt / so haben sie doch ihren allgemeynen Christlichen Glauben / darauff sie getaufft vnd dardurch Christo cynverleibet worden / behalten / vnd seynd auß lauter Barmhertzigkeit in Christo dem Herren selig worden / als die so ihr vertrauen in das Leyden / Sterben vnd Aufferstehung des vnschuldigen vnbesleckten Lambs Gottes / mit vestem Glauben gesetzt haben: vnd leugt der Mund der warheit nicht / da er sagt Johan. am 3. Cap. Wer in den Sohn glaubet der hat das ewige Leben.

Ist also wahr vnd außser allem zweiffel / da vnser liebe Voralteren einen solchen anlaß gehabt / vnd ihnen das Licht der Warheit so hell vnnnd klar vnter Augen geschienen / als es jetzt durch Gottes Gnad der Acklosen vndanckbaren Welt scheint / daß sie es mit höhern Freuden vnd weit einer größern Danckbarkeit erkandt vnd angenommen haben würden / als jetzt under beschicht / da man die gnädige heym suchung des Allmächtigen durch lauterer Trug vnd Vndanckbarkeit mit gewalt verstoß / vnd dann noch mit der alten cynfalt vñ vnwissenheit sich gern weißbrennen vnd beschönnen wolte.

Es sehen aber solche Leuth wol zu / daß sie der frommen Vorfahren exempel nicht mißbrauchen / vnnnd demnach sie das wort Gottes jetzt klar Predigen hören / vnd den reinen gebrauch seiner H. Sacramenten vor Augen sehen / ihnen durch solche greuwliche verachtung nicht ein schweres vrtheil des Allmächtigen auffladen / sintemal der hellen offenbarten: Warheit widersprechen / vnd vom richtigen Wege den vns der Herr zeiget / auß gefasstem mutwillen Abwege vnd Aufflucht suchen / ist nicht ein geringe



er Sünde/ vnd wirdt es der gerechte Gott gewislich nicht vnges  
strafft lassen hingehen: Dann der Knecht der des Herren willen  
was/ vnd thut ihn nicht/ wirdt mit vielen Streichen geschlagen  
werden.

Über dieses so heisset vns Christus die Geister prüffen/ ob  
er auß Gott seyen/ in der ersten Johan. am 4. Capit. Vnd will  
der Apostel Paulus in der ersten Epist. zun Thessal. am 5. Cap.  
Daß man alles prüffen/ aber allein das gut behalten/ vnd demselb  
ennachjagen soll: Darum daß auch dieses/ daß man von diesem  
der jenem Meister vnd Lehrer also vnd nicht anders vnderrichte  
t worden/ auch dabey verharren/ vnd im fall es vnrecht/ dieselb  
en es verantworten lassen wöll/ ein feinnüßer vnnnd durch auß  
nüttiger behelff vnd vngereimbtes Fürwenden ist.

Sintemal der Prophet Ezechiel am 3. vnd auch 33. Capit.  
saget/ beyde von denen Propheten vnd Lehrern/ die dem Gottlos  
en auß des HERREN mund sein Wort ankünden vnnnd ihn ver  
währen sollen/ aber es nicht thun/ Vnd dann auch zugleich dem  
Gottlosen selbst also/ Daß gleichwol der HERRE des Gottlosen  
Mut von solcher Propheten vñ Lehrer händen fordern wölle/ aber  
nichts desto weniger auch der Gottlos selbst vmb seiner Bosheit  
vnd Sünden willen sterben vnd vmbkommen solle.

Vnd wie Matth. am 17. stehet/ daß nicht allein der Blin  
denleiter/ der selbst Blind ist/ sondern auch derjenige zugleich der  
sich also leiten lasse/ in die Gruben vnd daß verderben fallen wer  
de/ vnd wann es einmal zur Rechnung kompt/ wirdt Gott nicht  
zum Herrn sprechen/ Was hastu deinen Knecht geheissen? Son  
dern er fraget den Knecht selber/ Was hastu gethan? Ist auch  
demnach meinem Wort vnd willen geschehen? Da wüßts nicht  
glen/ ich laß es den Herren verantworten/ Sonder hastu mit  
mir gesündigt/ so mustu auch gleichen Lohn vnnnd Straff em  
pfangen/ vnd heist/ Es wirdt ein jeglicher gerichtet werden  
nach seinen Wercken/ Matth. 16. 2. Corinth. 5. Rom. 2.

So lehret der Herr Christus/ Matth. am 23. Cap. durch

das Exempel der Pharisæer die Wasser vnd Land umbzögen/ clenen Judengnossen zu machen / daß solche wiedertwertige Lehrer/welche die Leuth auff ihre irrige falsche meynung ziehen/ auff denselben Kinder der Hellen machen/ zweyfach mehr als sie selbst seynd.

Vnd schreibet der Apostel Petrus in der 2. Epist. am 2. Capit. daß so wol als vorzeiten vnter dem Volck Israel falsche Propheten gewesen/ auch zu diesen vnsern letztenzeiten vnter vns falsche Lehrer seyn/ die schädliche Secten eynführen/ den HERRN der sie erkauft verläugnen/ vnd vber sich vnd die ienigen so ihrem Verderben folgen/ ein schnell verdammuß führen werden.

Fürs ander/ so werden von etlichen fürghewendet die vielfaltigen änderungen in der Religion/ so durch tödlichen abgang der Herrschafften eyn vñ fürzufallen pflegen/ mit fürgeben/ daß man sich nicht allwegen hin vnd her drehen/ lencken vnd wenden lassen soll/ wie der Wetterhan auff dem Thurn/ oder das vnsechte Kohn vom Winde.

Darauff ist die Antwort/ daß ja ein Christ seines Glaubens grundt haben/ vnd billich sich nicht von einem jeden Wind der Lehr lencken vnd wenden lassen/ sondern bey der einmal erkanteten/ bekandten/ vñnd in Gottes wort gegrünten warheit/ so lieb ihm sein ewige Seligkeit ist/ fest vnd standthafft stehen vnd verharren solle.

Da aber jemand in Irthumb steckt/ vñnd mit grunde Göttliches worts desselben vberzeuget/ vñnd also eines besseren vnderichtet wirdt/ derselbige aber nichts desto weniger auff seinem Kopff stehen/ vñnd lieber im Irthumb verharren/ als der Warheit/ welcher er in seinem Herzen vberwiegen/ platz geben will/ Ein solches ist keine gebürende Christliche Beständigkeit/ sonderen viel mehr ein mutwillige/ böshafftige/ trugige Halsstarrigkeit: Wie hingegen dieses gar nicht für eine Beständigkeit/ oder einen leichtfertigen Abfall/ wenden vnd trehen zu halten/ sondern gang Christlich/ löblich/ vñnd zu vnserer Seelen Heyl

Heyl vnd Seligkeit nöthig ist / da man von der Lügen vnd dem Irthumb sich zu der Warheit bekennet vnd begiebet.

Zu dem / so ist auch die wahre Christliche Religion im wes-  
nigsten nicht auff Fürsten Herrn oder andere Menschen / sie seyen  
gleich wer / vnd heissen wie sie wollen / sondern allein auff den All-  
mächtigen Gott vnd sein heiliges allein Seligmachendes Wort  
gegründet / welchem die Fürsten / Herren vnnnd Potentaten selbs  
den so wol vnd weniger nicht / als die Vnderthanen vnd gemeyn-  
ne Leuth / da sie anders Christen seyn / oder dafür gehalten werden  
wollen / gehorsamgi / auch sich nach demselben durch auff richten /  
vnd ihm im geringsten weder Was noch Ordnung geben / sondern  
solches alles von vnd auß dem Grund desselben schöpfen vnnnd  
empfangen müssen.

Daß aber bißweilen durch Absterben frommer Gottseliger  
Regenten oder Oberherren / änderungen in der Religion eyn vnd  
fürfallen / ist in allweg vonnöthen in solchem einen Vnderscheidt /  
vnd also nicht alle änderungen für vnrecht vnnnd böß zu halten /  
sonder allein die jenigen / wann an statt der Warheit vnnnd reinen  
Gottesdienst Lügen vnnnd Abgötterey eyngeführt wirdt. Da  
nun ein solches sich etwan zuträgt / so geschicht es fürnemblich  
vmb zweyerley Vrsachen willen:

Als erstlich von wegen der fleischlichen Sicherheit / Bos-  
heit vnd erschrecklichen Vndanckbarkeit der Menschen / welche  
die Ohren von der Warkeit mutwillig abwenden / sich zu den  
Fabeln oder Lügen kehren / vnd ihnen selbst Lehrer auffladen / nach  
dem sie die Ohren jucken / in der 2. Epist. Pauli zum Timoth.  
am 4. Cap. ja die ihnen erwählen Tüncher die mit lossem Ralck  
tünchen / vnd Rüssen machen vnter die Arme / vnd Psülben zu den  
Haupten / dieser Leuth Seelen zu fahen / damit sie in ihrer Si-  
cherheit ruhen / vnd in ihren Sünden sanfft eynschlaffen / Ezech.  
am 13. Cap.

Darumb dann / vnnnd weil sie die Warheit mutwillig ver-  
sossen / vnnnd die Finsternuß mehr lieben als das Liecht / so schickt  
ihnen Gott kräftige Irthumb / in der 2. Epist. Pauli zum Thes.

am 2. Cap. gibt sie auch dahin in einen verkehrten Sinn / zum Rom. am 1. Cap. ja verstockt ihre Herzen / lasset ihre Ohren dick seyn / vnd blendet ihre Augen dermassen / das sie die Wahrheit mit jren Herzen weder verstehen noch fassen können / ob sie schon solche eusserlich mit den Ohren hören / damit sie sich nicht bekehren vnnnd genesen / wie der Prophet Iesaias am 6. Cap. saget. Welches dann also ist das gerechte Urtheil des Allmächtigen Gottes / der billiche Lohn des Irthumbes / vnd die wolverdiente Straff der mutwilligen verstockung vnnnd bosshafftigen verstossung der Göttlichen Wahrheit.

Darnach vnnnd zum anderen lasset Gott der Herr die andern in der Religion auch darumb geschehen vnnnd fůrgehen / auff das seine liebe Außerwehlten / bewehrt / erkandt vnd von den Heuchlern vnderschieden werden. Dann je vnd allweg die Erfahrung geben / geschicht auch noch heutigs tags / wann es in der Kirchen wolsteht / lauter Ruhe vnnnd Frieden vorhanden ist / so seynd wir alle gute Christen / vnd können die faule Fisch vnd Heuchler vor den guten Fischen vnd rechten Christen nicht erkandt werden: So bald aber die trůben Wolcken sich ein wenig erzeigen / andern in Glaubenssachen eynfellt / vnnnd die Hůr der Verfolgung sich nur etlicher massen mercken lasset / als dann werden die Gedanken vieler Herzen offenbar / vnd geschicht eine absonderung der Sprewer von dem Weisen / In dem nemlich die Gottlosen Heuchler gleich wie die Sprewer vom Winde dahin fahren / vñ nicht bleiben in der Gemeyn der Gerechten / Psalm 1. sondern gehen stracks von den Rechtglaubigen auß / dieweil sie auch nicht von ihnen / oder ihre wahre Mitglieder gewesen / ob sie schon ein zeitlang bey ihnen gewesen / in der ersten Epist. Iohannis am 2. Cap. Ja so wenig als mit Keuerens zu schreiben der Wist vnnnd Roth für ein Glied / Stůck vnd Theil des menschlichen Leibs zu achten / darumb das er in demselben ist: Also wenig vnd noch viel weniger seyndt auch solche Heuchler vnnnd aberrännige für wahre Glieder der Christlichen Gemeynne zu halten / ob sie schon auch ein zeitlang darinnen gewesen seyndt.

Wann man aber die Sachen an ihr ſelbs erwegen vnd recht anſehen thut / ſo geſchicht eigentlich keine Änderung in der Religion oder im Glauben / wie die vnuerſtändigen Leuth vermeynen vnd ſürgeben / ſo viel nemlich die Religion vnd den Glauben für vnd an ſich ſelbſten betrifft: Dann das Göttliche Wort / vnd die Articul deß allgemeynen Chriſtlichen Glaubens vn beweglich vnd vnderwandelbar ſeyndt: ſonder es endern ſich nur die vnſtehtē / wandelmütige / ſichere / leichtfertige / vngottsförchtige Herzen der Menſchen / die in Glaubensſachen liederlich von einem zu dem andern fallen / vñ gern was ihnen anmutig vnd zu der fleiſchlichen Sicherheit dienlich iſt / annehmen / dieweil ſie keinen gewiſſen Grundt ihres glaubens gefaſſet / vñnd die Warheit nie recht erkandt noch geſchmäcket haben / ihnen auch es mit der Religion niemals erntſt gewesen iſt / ſonſten würden ſie ohne alle zweiffel durch Gottes gnad wol darbey als dem feſten grundt ihrer ewigen Seligkeit ſtandhaſtig verharren / vñnd ſich nicht alſo leichtlich davon abführen vnd wendig machen laſſen: Es würden auch als dann die Fürſten vnd Oberherren / die ſolche Enderungen etwan ohn befügter weiß der warheit zum Nachtheil fürnehmen / dieſelbigen nicht alſo leichtlich erhalten vñnd ins Werck richten können.

Endlich vnd zum dritten geben etliche für / daß ſie arme einfältige / vngelernte / vnuerſtändige vñnd der Schrifft vnerfahrene Leuth vñ Layen ſeyen / die wol glauben müſſen was man ſie lehret / vñnd gehen wie man ſie leitet / können ſich in die heut zu tag im ſchwand gehende vielfältige Religions ſtritt vnd Irungen nicht richten / wollen es den Gelehrten befehlen / vñnd warten biß dieſelben ſich dieſer Ding halben mit einander vergleichen / ſie als arme vngelicherte Leuthe die weder leſen noch ſchreiben können / werden gar irze gemacht / wiſſen nicht welchem Theil ſie glaube oder beſſer ſoll thun ſollen / dann ein jeder der oſelben wende für daß ſeine Lehr vñnd meynung recht vñnd in Gottes wort gegründet ſey / ſie aber ſeyen zu einfältig den Vnderſcheidt zu machen / vñnd welcher recht oder vurecht habe / zu erkennen.

Denen



Denen gibt man zur Antwort/ erstlich daß es ja billich vnd wol zu wunschen / daß man in der Religion einig/ vnd in den strittigen Puncten deroselben eine allgemeyne Christliche Vergleichung zutreffen were/ aber daß auff dieselbige ganz vergeblich vñ vmbsonst gewartet werde / dieweil nach der Lehr Pauli in der 1. Epist. zun Corinth. am 11. Cap. Kotten vnd Secten/ ärgernüssen vnd Irthumb seyn müssen/ die auch so lang die Welt stehet weharen/ auff daß die Rechtschaffenen offenbar/ vnd der Aufse. welken Gedult/ Beständigkeit vnd Gottseligkeit bewert werde. Vnd hat hievon der heilige Augustinus ganz tröstlich geschrieben / de correctione Donatistarum Cap. 2: Es sey zuvor geweißsaget daß Keckereyen vñd ärgernüssen kommen/ auff daß beyde vnser Glaub vnd Liebe bewehrt werden: Der Glaub zwar darinnen/ sowir vns nicht lassen verführen / die Liebe aber / daß wir allen möglichen Fleiß fürwenden/ sie zu bekehren.

Darnach daß ein jeder/ er sey gleich so schlecht vnd eynfältig als er immer wölle/ wann er nur ein Christ ist/ vnd die Hauptstücke der Christlichen Religion weiß/ die er dann/ daer ein Christ ist oder seyn will/ billich können soll: auß denselben vnd durch dieselbige Anlaß vnd Vnderricht gnugsam habe / wie er sich in die strittige Religions puncten richten/ auch so viel ime zu seiner Eeligkeit zu wissen vonnöhten vnd gnugsam ist/ die Lehren vnd das jhme so jhme beyde zu glauben vnd zuhalten fürgetragen wirdt/ prüfen vnd vndercheiden/ auch also wer recht vnd Gottes Wort gemäß lehre oder nicht/ leichtlich wissen kan.

Dann erstlich so hat er die Zehen Gebott Gottes/ darinnen jhme der HERR seinen willen geoffenbaret/ vnd wie er sich beyde gegen jhme seinen Gott vnd Schöpffer / vñ dann auch gegen dem Nächsten verhalten soll/ auffgelegt vnd befohlen.

Wirdt nun ein Christ von jemandes geheissen / angewiesen oder gelehret etwas für zunehmen vnd zu thun/ das von dem Allmächtigen Gott in den Zehen Gebotten verbotten ist / oder him gegen ime etwas zu vnderlassen vñd nit zu thun verbotten / welches der Herr darinnen befohlen hat / so soll er dieselben vor die Hand



Hand weſſen/ſie ihm eine gewiſſe Regel vnd Richtſchnur ſeines Lebens ſeyn laſſen/der geſtalt daß er darwider nicht thut/ſondern thut was Gott der Herr in denſelben gebotten/vnnd vnderlaſſe was darinnen verboten hat/ es lehre ihn gleich ein anders was er ſimmer wolle.

Am andern ſo hat ein Chriſt die zwölff Articul deß allgemeinen Chriſtlichen Glaubens/darauff er in ſeinem Tauff Gott den Vatter/ dem Sohn vnd heiligen Geiſt/ als ſeinem einigen/ einzigen getrewen Gott vnd Herren gehuldiget/ gelobt vnnd geſchworen hat/darumb er dann auch dieſelben ihm als eine gewiſſe Richtſchnur vnd Probir oder Streichſtein/ daran er alles das ſo ihm auff Gottes Wort oder als Gottes Wort fürgebracht vnd vorgegeben wird/halten/vnnd nach demſelben die Lehren vrtheilen vnd richten ſoll.

Es wirdt aber in den Glaubens Articulen angezeigt/ in was vnd was man glauben ſoll.

Underrichtet vnd lehret man dann jemand das jenige/ ſo den Articuli deß Glaubens ähnlich/gleichförmig vnd gemäß iſt/ ſo ſoll er billich/ iſt auch ſchuldig bey verluſt ſeines ewigen Heyle dasſelbige anzunehmen vnd fäſtiglich zu glauben.

Wirdt aber jemand etwas gelehret/ das demſelben vngemäß/ entgegen vnd zuwider iſt/ als daß man in einen andern als den einigen/ewigen/wahren/allmächtigen Gott/Vatter/Sohn vnd heiligen Geiſt/ oder von ihm anderſt als die Articuli deß Chriſtlichen Glaubens aufweiſen (inmaſſen dann heutigs tags die Ubiquitiſten faſt alle dieſelben/ oder ja deren den mehrern Theil in grundt umbſtoſſen vnd verkehren) ſonderlich aber von dem Herren Chriſto glauben ſoll/ daß er einen vnſichtbaren/obern/natürlichen/vnbegreiflichen/ vnd einen ſolchen Menſchlichen Leib habe/ der allenthalben zugegen vnnd in ſeiner Himmelfahrt nicht einen Strohalmen breyt von der Erden auffgefahren/auch nicht im Himmel vnnd in der Hellen ſey/ ſamt was ſonſten dergleichen erdichteten Fabelwerck mehr ſeyn mag. So iſt hin-

gegen auch ein Christ gleichfalls bey verlust seiner Seligkeit dasselbige nicht anzunehmen / sonderen es als das allerschädlichste Seelengift mit allem angelegenem höchstem Fleiß zu meyden vnd zu verwerffen schuldig vnd verbunden.

Item vnd zum dritten / so hat ein Christ das heilige Gebet / welches man das Vatter Unser nennet / darinnen der Herr Christus selbst lehret / wen man anrufen / auch wie vnd was man in seinem des Herren Christi Namen von Gott bitten vnd begeren solle.

Da nun jemand anders als dasselbige heilige Gebet lehret / oder etwas wider den willen Gottes zu bitten einen Christen anweisen wolte / soll er demselben mit nichten folgen / sondern allein dara: ff sehen / wie vnd was ihme der Herr Christus zu bitten befohlen hat.

Also vnd zum vierdten / wie gleichfalls auch zum fünfften vnd letzten / haben die Christen die klare richtige Ordnungen vnd Eynsazungen der beyden Sacramentē des neuen Testaments / des heiligen Tauffs vnd des heiligen Abendmals / wie sie der Herr Christus auch selbst eyngeſetzt / verordnet vnd zu halten befohlen hat.

Im fall nun entweder in den Ceremonien oder in der Lehr dieser beyder Sacrament / eines oder des andern / etwas geändert / verfälscht / vnd wider den rechten Schriffimässigen verstand deroselben fůrgeben / gedeutet vnd zu halten oder zu glauben befohlen werden / als daß man im Tauff ein ander Element als Wasser / vnd im Abendmal andere eussertliche Zeichen / dann Brot vnd Wein / oder bey dem Tauff den Aberglaubischen Papiſtiſchen Ehrſam / vnd abscheulichen verfluchten Exorcismum / das iſt die Beſchwerung vnd Austreibung des Teuffels von den jungen Kindern brauchen / vnd die Gnad oder Gab ſelbs / als die Vergebung der Sünden / vnd die allein durch das heilige Leyden vnd Sterben Jesu Christi erworbene wahre Gerechtigkeit vnd ewige Seligkeit (wie leider heutigs tags in Papiſthumb vnd Lutherthumb

erſtlich mehr als zu viel beſchicht) in die cuſſerliche ſichtbare Zeichen vnd irbiſche Elementa einſchließen/verbergen oder vermischen / vnnnd denſelben eine ſonderbare Krafft vnnnd Wirkung andichten vnd zuſchreiben wollen/ ſolte.

Da hat fürwar ein Chriſt auff die Ordnung vnnnd Eynſamung der Sacrament zu ſehen/ an dieſelbe ſich feſt zu halten/vnd ſolche ſampt allen anderen derogleichen nichtigen / Aberglaubſchen Gedichten/ als die deroſelben vngemäß vnd der meynung deß Stiſters vnſers Heylands Chriſti gänzlich zu wider ſeyndt/ hindanzulegen vnd zuverwerffen.

Vnd diß ſeynd also vnter nach vielen andern mehr die fürnehmſten Urſachen vnd Aufſchlüchte / ſo heutigs tags die Leuthe zu beſchönung ihres Irthums/darinnen ſie ſtecken/ gemeinglich fürzuwenden pflegen.

Wiewol darbeynaben auch allhie deren nicht zuvergeſſen iſt/die da wollen daß man die Vernunfft in Gottes ſachen nicht brauchen/ ſonder ſie ... den Gehorſam deß Glaubens gefangen nemen/ vnd glauben ſoll/was Gott vns ſaget/ vnnnd daſſelbig eynſältig ohn alles diſputirn / gräblen vnd forſchen.

Dieſen fürſätzlich vnnvernünftigen Leuthe gibt man vernünftiglich zuvernemen/ daß die Vernunfft gefangen nemen/ vnd einſältig bey dem Gehorſam Gottes worts bleiben/ dann erſt recht vnd wol gethan ſeye / wann man nemblich Gottes wort recht verſtehet: Dann man ja bey dem geoffenbarten willen Gottes eynſältig verharren/ demſelben Beyfall thun/ vnd nach dem ſeinigen das er verborgen/vnd in ſeinem heiligen Wort nicht außträdlich geoffenbaret oder vns verkündet hat / nicht vnnöthiger/ freuentlicher / fürwitziger / ſorgſältiger weiß gräblen vnnnd forſchen ſolle.

Aber gleich wie Gott will daß man ſolcher geſtalt einſältig vnnnd zu frieden ſeye / Also will vnd beſücht er hingegen auch daß man flug vnd fleißig ſeyn ſoll/ ſeinem geoffenbarten Wort vnnnd Willen mit allem angelegenem Ernst nachzuforſchen/ wie dann

Christus außdrücklich heisset Johan. am 5. Cap. in der Schrift nachfolch n/ die weil sie von ihm zeuget/ damit man einen gewissen festen grundt des Glaubens darauß schöpffe/ vnnnd nicht von einem jeden Wind der Lehr/ gleich den vnbefändigen Kohnen vnd Wasserrwagen hin vnd wider getrieben werde.

Also gestchet man/ war gern/ daß man in dem jenigen so der Allmächtige Gott in seinem Wort nicht geoffenbaret/ die Vernunft nicht brauch en/ vnnnd seinen heymlichen hochweisen Rath viel mehr ehren/ vnd denselben mit höchster Verwunderung anbeten/ als mit der dollen Vernunft erforschen wollen/ solle.

Sonsten aber/ da jemand in dem jenigen so Gott in seim Wort geoffenbaret vnd befohlen hat/ vnvernünftig/ vnwissent vnnnd vnuersändig/ oder denen gleich seyn will/ von welchen der Apostel Paulus in der 2. zum Timoth. am 3. Capit. schreibt/ Die allzeit lehren/ vnnnd nimmer zu rechter erkantnuß Gottes vnd seines Wortes zu kommen begeren/ der wirdt ein stäter zweiffel/ vnnnd den vnvernünftigen Creaturen/ die gar keinen Verstand haben/ gleich seyn: Dann ja der Allmächtige Gott den Menschen vernünftiger erschaffen/ vnnnd mit einer verständigen Seelen begabet hat/ war nicht daß er ein grober Klotz/ von Gottes Sachen nichts vernemen/ oder als ein Kof vnd Maulthier das nichts versteht/ wie David im 32. Psalm saget/ seyn: sondern/ daß er den geoffenbarten Göttlichen Willen/ auß seinem seligmachendem Wort/ recht vnd gründlich erkennen lehren/ vnnnd demselben beyde im Glauben vnd Leben/ sich gehorsamlich vndergeben/ vnd gemäß verhalten soll.

Ebenermassen ist auch dieses außser allem zweiffel/ daß man nemlich glauben soll/ was Gott sagt: Daß wer dasselb nicht thun wolte/ der hette den rechten Glauben nicht/ vnd wer einem Heyden vnd Nachristen gleich zu halten: sintemal des Herren Wort warhafftig ist/ vnd was er zusagt das helt er gewiß/ Psalm. 33.

Es folget aber darumb gar nicht/ daß eben alles Gottes Wort sey/ was von den Menschen vor Gottes Wort dargegeben

den/ oder daß ein jeder Verſtand/ welcher der Schrifft auß  
Menschlichem Hirn/ entweder durch ſelbſt erwählte andacht/ oder  
eigens gefallenſ angeedichtet/ vnd ja wol etwan auch wider  
das außdrückliche Wort Gottes/ vnd das Gewiſſen/ allein zeit  
licher Ehre vnnnd Genieſſes halben eingeführet vnnnd behauptet  
wirdt/ der rechte eigentliche verſtand der Schrifft ſeye/ dem alle  
Menſchen durchauß beyfall thun müſſen.

Entnemal die Schrifft da ſie vnrecht verſtanden/ vnd ver  
ſetzt außgelegt wirdt/ nicht mehr Schrifft/ ſondern ein 'thörich'  
in Menſchenland vnd bloſſer nãrlicher wohn iſt. Hier gegen  
über iſt vnd heiſſet Schrifft vnd rechter Schriffmäßiger Ver  
ſtand allein dieſes/ welches in Gottes heiligem Wort/ den Pros  
phetiſchen vnd Apoſtoliſchen Schriffen/ vnnnd Büchern deß al  
ten vnd neuen Teſtaments/ gegründet/ mit dem einhelligen con  
ſenſ der vbralten Chriſtlichen Kirchen / wie auch den Lehren/  
Symbolis vnnnd Glaubens bekantnuſſen der alten reinen Lehrer  
vnnnd Väter übereinſtühret/ vnd da die Schrifft durch Schrifft/  
eine iuſas Menſchlichen Hirns gedichts/ erkläret vnnnd außge  
legt wirdt.

Daſſelbige allein iſt man ſchuldig anzunehmen vnnnd zu  
glauben/ die weil dieſes der Brun vnd die einſige Regel vñ Nicht  
ſchnur iſt/ darnach die Lehren gerichtet vnnnd gevrtheilet werden  
ſollen. Das vbrige aber alles ſo dem ſelben zu wider/ entgegen vnd  
ungemãß iſt/ das ſoll ein jeder frolicher Chriſt bey verluſt ſeiner ſe  
ligkeit/ wie den Satan ſelbs/ ſtichen.

Dieſem nach/ vnd weil auß jehzt erzeltẽ klar vnd offenbar  
iſt/ daß alle die angeregte Urſachen/ einwürffe vnd beſchönungen  
durch man ſich heut zu tag/ wider das helle Licht der War  
heit in der Lehre von dem heiligen Abendmal im Irthumb vnnnd  
verſtande mutwillig vnderſtehet auffzuhalten/ den ſich nicht  
ſollen/ ſonderen durchauß nur loſe Außflüchte vnd vergebliche  
vnngebeſchönungen ſeynd: vnnnd aber ein Chriſt dem ſeine Se  
ligkeit mit rechtem ernſt angelegen vnd der Warheit von Herren



begirig ist/ wissen möge/ was er von solcher Lehre/ vnd dann auch zugleich der Person vnseres Heylands Christi/ als welche zweyen Punkten oder Articul der Christlichen Religion jetzt fürnemlich zwischen den Euangelischen strittig seynd/ eigentlich halten vnd glauben soll/ erheischet die notturfft darvon einen kurzen vnderricht zuthun.

Vnd erstlich so lehret von der Person des HERRN Christi Gottes Wort/ bezeugen die einhelligen Glaubens bekantnußsen der vralten Christlichen Kirchen vnd Vätter/ vnd bekennen noch heut zu tag alle rechtglaubigen Christen/ daß vnser getretweter lieber HERR vnnd Heyland Jesus Christus die zweyte Person/ der heiligen Dreyeinigkeit/ der eingeborne vom Vatter geborn/ das ist auß der Substanz/ Wesen vnnd Natur des Vatters/ Gott von vnd auß wahrem Gott/ ein Licht auß dem Licht geboren/ vnd nicht gemacht/ auch gleichs Gewalts/ Macht/ Ehe vnd Herrligkeit mit Gott seinem himmlischen Vatter vnnd dem heiligen Geiße seye.

Daß auch eben derselbige warhafftige Gott/ vor allenzeiten nach der Gottheit auß dem Vatter geboren/ vnd der Erstgeborne vor allen Creaturen/ zun Coloss. am 1. Cap. In den letztenzeiten aber von vnserer vnnd vnseres Heyls wegen/ ein rechter natürlicher vollkommener Mensch mit einer vernünftigen Seele vnd wahrem Leib/ vom heiligen Geiße empfangen/ vnd auß der Substanz vñ dem Wesen Marien der vnbesleckten Jungfrawen geboren seye/ einer Natur mit dem Vatter/ nach der Gottheit/ so der Glanz seiner Herrligkeit/ vnd das Ebenbild seines Wesens/ zun Hebr. am 1. Cap. vnd einer Natur mit vns/ nach der Menschheit: Ein Herz/ ein Christus/ vnnd ein Sohn/ Gott im Fleisch geoffenbaret/ in der 1. zum Timoth. am 3. Capit. vnd vns in allem gleich/ außgenommen die Sünde/ nach der Gottheit ohne Mutter/ vnd nach der Menschheit ohne Vatter: nach der Gottheit der Schöpffer/ durch welchen alles im Himmel vnnd auß der Erden ist erschaffen/ zun Coloss. am 1. Cap. nach der Menschheit aber



der die Geschöpf: nach der Gottheit allmächtig / vniersch  
 unbegreiflich / vucndlich / vnnnd allenthalben gegenwertig:  
 nach der Menschheit aber begreiflich / endlich / vmbfchrieben/  
 vnnicht allenthalben gegenwertig: der auch nach der Gottheit  
 weder ab noch aufffähret / sondern Himmel vnd Erden erfüllet/  
 nach der Menschheit aber warhafftig vnnnd sichtbarlich von der  
 Erden auffgefahren ist / vnd den Himmel eingenommen hat / in  
 in Apostel Geschichte am 3. Cap. oder wie Paulus in der 1. zum  
 Timoth. am 3. Capit. schreibet / auffgenommen in die Herrlig-  
 keit / allda er auch sitzt zu der Rechten seines himmlischen Vaters  
 vnd regiert als der rechte Himmelkönig / vnd das Haupt sei-  
 ner Gemein / alles was im Himmel vnd auff Erden ist / außserhalb  
 dessen / der ihme alles vnderthänig gemacht hat / in der 1. zum Co-  
 rinth. am 15. Cap.

Vnd daß dieser einige Christus / der eingeborne Sohn vnd  
 in zweien vnderschiedlichen Naturen / als der Göttlichen  
 vnd Menschlichen Natur / vnvermischt / vnzertheilt / vnverwan-  
 delt / vnd vngetrennt erkannt werden müsse. Daß auch der Na-  
 men vnderscheid / von wegen der persönlichen Einigkeit / mit-  
 nichten soll auffgehaben noch aufgelauret werden / sonder daß viel  
 mehr beyder Naturen Eigenschaften behalten / vnd in einer Per-  
 son / vnd einer Substanz zusammen gefasset / vnd aber nicht in  
 zwey Personen zertheilt werden sollen.

Dann ja die Göttliche Natur des HERRN Jesu Christi  
 nicht verwandelt / noch Fleisch worden / auch nicht in den ganzen  
 Menschen / der auß Seel vnd Leib bestehet / verändert worden ist:  
 Sonder es hat das Wort ihme das Fleisch vnd ein vernünftige  
 Seele / vnaußsprechlicher vnd unbegreiflicher weiß / durch eine  
 himmlische verborgene Verbündnuß / zu einer Person verei-  
 nigt / vnd ist Mensch / auch ein Sohn des Menschen genannt / vnd  
 so auß zweien vnderschiedlichen / vngleichen / mit einander ver-  
 bundenen / vnd persönlich vereinigten Naturen / Ein Sohn vnd  
 Ein Christus worden.

Dar

Darumb dann was in den Prophetischen vnd Apostolischen Schriften/in einigkeit der Person/vnd von wegen der personlichen vereinigunge von dem Herrn Christo/ vber von der ganzen Person des Herrn Christi geschrieben vnd angezeigt wirt/das soll vnd muß von wegen solcher seiner zweien vngleichen Naturen vnderchieden/vnd dasjenige/so der Gottheit oder Göttlichen Natur eigen ist/allein nach vnd von derselben: dasjenige aber so seiner Menschheit oder Menschlichen Natur zusieht vñnd gebührt/ auch allein nach vnd von derselben außgelegt/gedeutet vnd verstanden werden.

Ob auch schon Er der H E R R Christus warhafftig gestorben/ auß dem Tode wider auffgestanden/vnd gen Himmel gefahren ist/ so hat er jedoch durch denselben seinen Tode/Aufferstehung vnd Himmelfart/nicht die Warheit vnd Eigenschafft seines wahren Fleisches vnd Menschlichen Natur (wie Augustinus ad Dardanum schreibet) sonder nur die schwachheiten vñnd gebrechlichkeiten deroselben hin vnd abgelegt: ihre wahre Eigenschafften aber behellt er in alle Ewigkeit vnzerstört vñnd vnderändert.

Derowegen allhie außgeschlossen vnd verworffen werden alle Gottslästerliche Irthumb vñnd Ketzereyen/die der leidige Satan vorzeiten wider diesen Articul erregt/vnd jetzt widerum von neuem/gleichwol mit andern Namen vñnd Titeln geschnückt/ auß der Hellen herfür gebracht hat/deren fromme vñnd schuldige Leuth/von denen die damit schwanger gehn/mit vñnd grund beschuldiget vñnd verschreiet werden.

Als nemlich des Gottslästerlichen verdampften Ketzers Arrij/welcher gelästert vñnd geleugnet hat/das der Herr Christus nicht von Ewigkeit hero vom Vater geboren/ein wahrer/natürlicher/wesentlicher Gott/vnd dem Vater an Macht/Gewalt/Ehren vñnd Herrlichkeit gleich seye/sonder das er in der zeit angefangen/ein erschaffener gemachter Gott/minder/geringer/vñnd weniger sey als der Vater.

Item/

Item des Keyſers Neſtorij / welcher gleich wie er zwo vnderſchiedliche Naturen in Chriſto bekannt / alſo auch fürgeben vnd gelehrt hat / daß in Chriſto zwo vnderſchiedliche Perſonen / vnd zween Söhne / einer Gottes / vnd der ander des Menſchen: daß auch das Wort nicht mit dem Fleiſch zu einer Perſon vereiniget worden ſey.

Item des Keyſers Martionis / der da fürgeben hat / daß Chriſtus ſeinen wahren / natürlichen / greifflichen / ſonder einen erdlichen / oder ſantaſtiſchen Leib gehabt habe.

Item des Eutyſchis , vnd demſelben gleichen Vbiquiſtiſchen Irthumb / welche die Naturen des Herrn Chriſti ihrer Eigensſchaften berauben / vnd dieſelben von wegen der einigkeit der Perſonen vermischen / vermengen / vnd der Menſchlichen Natur göttliche Eigensſchaften zuſchreiben.

Item des Schvvenckfelds / vñ ſeiner zugethanen Schwärmer / ſo ein abſchewen hat / Chriſtum nach ſeiner Menſchheit in Creatur zu nennen / vnd alſo ihm einen vbernatürlichen vnd himliſchen Leib andichtet / will nicht zugeben / daß Chriſti Fleiſch eine Subſtanz vnd natürlicher weſen ſey / ſonder nur ein geiſtliche Hülle / allermassen wie der Glaub iſt / vnd die andere Gaben des heiligen Geiſtes ſeynd. Beweiſet mit der gleichnuß eines ſilbernen vergoldten Beckens / daß ebner geſtalt ſeine Menſchheit außwendig vnd inwendig vergöttert ſey / macht alſo ein drittes Weſen in Chriſto / welches weder Gott noch Menſch / ſonder ein göttlicher Menſch / oder menſchlicher Gott ſeye.

Wie auch alle andere Gottoläſterliche / abſchewliche / verſchworliche Irthum vñ Schwärmeren / damit der leydlige Teufel die ſüßereſtliche tröſtliche Lehr / von der Perſon des Heylands Chriſti begert zu verdunceln / vmbzuſtoſſen / vnd zu vernichten / damit verworffen ſeyn / vñ von einem jeden wahren Chriſten mit ganzem ernſt gemiddten werden ſollen. Vñ dieſes ſo viel die Perſon Chriſti betrifft.

Den andern puncten oder Articul das heilige Abendmal

anlangend/darvon ist dieses die kurze einfältige/ in Gottes Wort gegründte/ vnd allenthalben in den von dem vberigen Sauerteig des leidigen Papstthums gänzlich aufgesäuberten vnd reformirten Euangelischen Kirchen angenommene Meynung vnd Bekantnuß:

Daß nemlich vnser getrewer lieber Herz vnd Heyland Jesus Christus wahrer Gott vnd Mensch / in seinem heiligen Abendmal allein seine Glaubigen ( dann die Unglaubigen vnd Gottlosen nur das Brot vnnnd den Wein des Herrn mit dem eussertlichen Mund/dieweil sie des innerlichen munds der Seelen/nemlich des wahren Glaubens manglen / auch ihnen der Herr nichts verheissen hat / empfangen vñ niessen ) durch krafft vnd würckung des heiligen Geistes an ihren Seelen zum ewigen Leben speise vñ träncke / mit seinem für ihre Sünden in den Todt hingegebenem wahren Leib / vnnnd für sie vergossenem wahren Blut / so gewiß / warhafftig vnnnd eigentlich / als sie auß der Hand des Kirchendieners empfangen vnnnd leiblich niessen die irdische sichtbare Zeichen / das heilige Brot / vnnnd den heiligen Wein / welche ihnen als gewisse Pfand / Sigill vnnnd Versicherungen des gecreuzigten Leibs vnd vergossenen Bluts des Herrn / gegeben / mitgetheilt vñ vberreicht werden / auch sie dieselben zu danckbarer gedächtnuß / solcher vberaus grossen Gnad vnd Wohlthaten mit ihrem leiblichen Mund essen vnd trincken.

Daß auch alles Leiden sampt dem völligen willigen gehorsam / welchen der Herr Christus seinem himmlischen Vater / von zeit seiner empfangnuß an / biß zum tod / ja zum tod am Creuz / wie der Apostel Paulus zun Philip. am 2. Cap. saget / geleistet hat / so gewiß / warhafftig vnd vnfehlbar ihr eigen sey / als wann sie selbst in eigener Person denselben erfüllet / vnd alles das jenige so der Herr Christus an seinem gebenedeyeten Leib für sie erlitten / an ihren eigenen Leib gelitten / vnd gnug gethan hetten.

Daß also den Leib vnd das Blut des Herrn Christi im heiligen Abendmal essen vnnnd trincken / heisse vnd seye / mit wahren

feynem

ſeſtem Glauben/herzlichem vnzweiffelichem vertrauen / vnd ge-  
wiſſer tröſtlicher zuverſicht / den allerheiligſten Verdienſt / die  
völlige Genugthuung vñ bezahlung für die Sünde / welche nicht  
mit vergänglichem Silber oder Gold / ſondern mit dem thewren  
Blut Chriſti geſchehen iſt / in der 1. Epist. Petr. am 1. vnd 2. Item  
in der erſten zun Corinth. am 6. vnd zun Colos. am 1. Cap. anne-  
men / vnd ihme ſelbſt zueignen.

Gerne / daß auch die Glaubigen durch den heiligen Geiſt  
der zugleich in Chriſto dem Haupt vund in ihnen den Gliedern  
wohnet / ihme dem Herrn Chriſto eingeleibt / vnnnd dermaſſen mit  
ſeinem heiligen Leib je lenger je mehr vereinigt werden. Johan.  
am 6. Cap. daß ſie / ob Er der Herr Chriſtus mit demſelben ſchon  
hoben im Himmel zur Rechten deß Vatters iſt / zun Hebr. am  
1. vnd 5. Cap. in den Geſchichten am 3. vnd in der 1. zun Corinth.  
am 11. Cap. vnnnd ſie die Glaubigen noch hieunden auff Erden  
ſeynd / dannoch Fleiſch von ſeinem Fleiſch / vnnnd Wein von ſeinen  
Weinen ſeyen / zun Eph. am 3. vnnnd 5. in der 1. zun Corinth. am  
6. in der 1. Johan. am 3. vnd 4. vnd Johan. am 14. Cap.

Ja daß ſie die Glaubigen ihrem Haupt Chriſto durch das  
ſtarcke vnauflöſliche Band den heiligen Geiſt viel feſter / ſtärcker  
vnd genawer verknüpfft / vereinigt / vnnnd verbunden werden / als  
ſie leblich Haupt vnd Gliedmaſſen / durch die Gelencke vnnnd A-  
dern / mit vñ vñter einander verbunden vñ vereinbart ſeynd. Von  
welchem ihrem Haupt / auch ſie das Leben vñ die Seligkeit haben /  
vnd empfangen / Gleich wie ein Rebe von dem Weinſtock / dem  
ſie eingepflanzt iſt / ſafft vnd krafft bekompt.

Darumb ſie dann auch auß ſolcher krafft / vnd durch dieſe  
Göttliche Gnadenwirkung / fürters den alten Menſchen tödten /  
demſelben abſterben / vnnnd in dem newen auferſtehen / das iſt / den  
Sünden je lenger je mehr abzusterben / nach dem willen ihres Her-  
ren vnnnd Erlösers / der ſie alſo thewer erkauft hat / in allen guten  
Wercken zu wandlen / vnd alſo mit ihrem ganzen Leben / für ſolche  
unſprechliche Genad vnd fürtreffliche Erlöſung / ſich ſo viel



jimmer müglich danckbar zu erzeigen / vnderstehen vnd befließen/  
 zum Röm. am 6. vnd 12. zum Ephes. am 4. zum Coloss. am 3. in der  
 1. zum Corinth. am 5. an die Galat. am 2. In der 1. Petri am 2. vnd  
 Joel am 2. Cap. Sientmal es vnmöglich ist/das die/welche dem  
 Herrn Christo eingepflanzt seynd/ nicht fruchte der danckbarkeit  
 bringen solten. Matth. am 17. Cap.

Dieweil auch den Glaubigen durch das heilige Sacrament  
 des Abendmals/ nichts anders bestetiget oder versiegelt/ als das  
 jenige so im gepredigten Wort des Euangelij ihnen verheissen  
 vnd verkündigt wirdt/ nemblich die vnerdiente genädige verzei-  
 hung der Sünden / wahre Gerechtigkeit vnd die ewige Selig-  
 keit/ vnd solches allein vmb des Leidens vnd Blutvergiessens Jesu  
 Christi willen: so wissen sie auch von keinem anderen Heylands/  
 vielweniger von einem vnsichtbaren vnnnd unbegreiflichen Leib  
 desselben ihres Heylands Christi / der ihnen entweder im gepre-  
 digtem Wort verkündigt / oder durch das heilige Abendmal an-  
 gebildet wirdt/wie auch von keiner anderen weis/dardurch densel-  
 bige beyde im Wort vnd Sacrament vberreicht vnd empfangen  
 wirdt/ als nechst hievor erklärt vnd angezeigt worden ist/ nemlich  
 dem wahren Glauben.

So stellen vnd setzen sie derowegen ihre ganze hoffnung/ ja  
 all ihr vertrauen/ trost vnd zuversicht / durchaus allein auff den  
 wahren wesentlichen sichtbaren / begreiflichen Leib ihres getrewen  
 Herrn vnd Heylands Jesu Christi/ welchen er zu Hierusalem für  
 sie vnd ihre Sünden am Creuz auffgropffert/ an welchem er ihre  
 Kranckheiten getragen/ vnd auff welchen er ihre Schmercken ge-  
 laden/wie der Prophet Jesaias am 53. Cap. meldet/ dardurch er  
 auch ihnen seinen Auferwehlten Glaubigen die Versöhnung mit  
 seinem himmlischen Vatter/ die gnädige Vergebung aller ihrer  
 Sünden/die Gerechtigkeit vnnnd das ewige freudenreiche Leben/  
 sampt allen himmlischen Gütern vnd Schätzen verdient vnd zu-  
 wegen gebracht hat. Inmassen dann auch beyde das gepredigte  
 Wort des Euangelij vnd die heilige Sacrament/ ihren Glauben  
 auff



auff denselben wahren / natürlichen / geereusigten / gestorbenen /  
wider aufferstandenen vnd warhafftigen Himmels gefahrenen Leib  
Christi / als auff den einigen festen vnbeweglichen Grundt ihres  
Heils allein weisen. Wie solches fürnemblich angezeigt vnd ge-  
lehrt wirdt / Matth. am 26. Marci am 14. Luc 2 am 22. Johan.  
am 6. 14. vnd 19. in der 1. zun Corinth. am 5. 6. 10. 11. vnd 12. zun  
Heb. am 7. 9. vnd 10. vnd in der 1. Epist. Johan. am 3. vnd 4.  
Cap. So hat auch je vnd allwegen die Rechtglaubige Christen-  
heit also vnd nicht anders gelehrt vnd geglaubet.

Wernun in diesem hellen Licht der Warheit vber das bis-  
her so vielfaltig beschehen warnen / vermahnen vnd vnderrichten  
noch mutwillig blind verstockt vnnnd vnwissent seyn vnd bleiben  
will / denselben wirdt solche seine mutwillige Vnwissenheit / vnnnd  
etwige Halbstarrigkeit an jenem Tag vor dem Gericht des all-  
mächtigen Gottes / vnd dem Vrtheilstul Christi Jesu so wenig  
entschuldigen / daß sie ihn auch viel mehr zum strengsten anklagen  
vnd von der ewigen Seligkeit entfrembden vnnnd aufschließen  
wirdt.

Zwar es bedarff der allerhöchste Gott / der für sich ein Herr  
ist des Himmels / der Erden / vnd alles dessen so darinnen / vnser  
der Menschen zu seiner Herzigkeit gar nicht: wir aber können des  
Heren vnd seiner Gnade zu vnserer zeitlichen vnd ewigen Wol-  
fahrts wenigsten nicht entrahten / wie auch wahrer Gottesdienst  
ihnen mit nichten / sondern dem Menschen muß vnd ersprißlich ist /  
zu dem so wirdt auch der Himmel vmb deren willen die nicht hin-  
zuwollen / nicht läßt stehen / auch Recht vnd die Warheit ohne  
se wol Recht vnd Warheit bleiben / vnd alle fromme Herzen ihn  
zu fallen / im 94. Psalm.

Darumb dann die jenigen / welche vber so mehrfaltiges gut-  
fertiges warnen / vnd genugsames vberzeugen auff ihrem gefas-  
ten wahn vnd Irthumb nichts desto weniger trügig verharren /  
die angebotene Göttliche Genad mutwillig verachten / vnd die  
Warheit lästern vnd verstoßen wollen / wol zu sehen mögen / daß

sie vmb solcher erschrocklichen halbstarrigkeit / verachtung vnnnd vndanckbarkeit willen nicht der mal eins von dem gerechten Gott / der allbereit / wie Augenscheinlich / sein Schwerdt gewetzt / seinen Bogen / darauff er tödliche Geschosß gelegt / gespannt / vnd seine Pfeil zu verderben zugericht hat / wie Dauid im 7. Psalm saget / schwerlich heimgesucht / vnnnd als dann von ihme / wann sie schon lang schreien vnnnd ruffen / gleich wie sie jetzt seine heilige Warheit verstoßen / vnd nicht hören noch annemen wollen / auch nicht erschöret werden: Dann wann man nicht auffmercken / Gott den Rükcken lehren / die Ohren vor der Warheit verstopffen / vñ die Herzen wie ein Diamant verhärten will / daß sie nicht hören das Wort / welches der Herr sendet in seine Geist / so will er auch nicht hören / wann man zu ihme ruffet / Zach. am 7. Cap. ja Er will wie er bey dem Propheten Amos am 8. dräwet / einen Hunger vnnnd Durst ins Land schicken / nicht nach Brot vnnnd Wasser / sonder nach seinem Göttlichen Wort zu hören / auch sonst mit andern vielfältigen Straffen vnnnd Plagen / solchen gottlosen Spöttern vnd Verächtern zu erkennen geben / daß ein Prophet / das ist fromme gottselige Lehrer vnder ihnen gewesen seynd / die sie vor ihrem vndergang vnd verderben trewlich gewarnet / zur Buß vnnnd dem Glauben vermahnet / vnd den weg der Warheit ihnen mit altem ernst vnd fleiß angezeigt vnd eröffnet haben. Dann du Verächter / meynstu man werde dich nicht verachten / wann du des verachtens ein ende gemacht hast / so wirdt man dich wider verachten / spricht der Herr bey dem Propheten Jesaia am 33. Cap. ja das vnglück wirdt mit hauffen auff solcher spötter vnd verächter Köpff / vnd ihr freuel auff ihre Scheittel fallen.

Darumb so heisset es / wie der heilige Geist spricht im 95. Psalm / Heut / heut / wann ihr seine stimme höret / so verstocket ewre Herzen nicht. Dann der Herr denen die arge / verbitterte / vnglaubige / verstockte Herzen haben / vnd den weg der Warheit verlästern / oder sie in Vngerechtigkeit auffhalten / in seinem Zorn geschworen hat / daß sie zu seiner ruhe nicht kommen

men ſollen/in gemeldten 95. Psalm / am ende/ vnd zun Hebr. am 3. vnd 4. Cap.

Aber/ O lieber Herz vnser gnädiger Gott vnd getrewer Vater / wir bitten dich von grund vnserer Herzen / daß du (wie dein heiliger Prophet Jesaias am 48. Cap. sagt) vmb deines heiligen allertreflichen Namens willen / gedultig seyn / vnnnd viß deines Ruhms willen dich enthalten wöllest / daß wir von wegen vnserer ganz erschrocklichen Sicherheit / freuentlicher Vermäßenheit vnd schändlichen Vndanckbarkeit / nicht außgerottet / vertilget / oder von deinem heiligen Angesicht verstoßen werden: wie wirs dann solcher vnd anderer vnserer schweren Sünden vnnnd Vbertretung halben / gar wol verdienet hetten. Aber vmb deinet/ ja vmb deinet willen/ O Herz/wöllest du es thun/ vnnnd vns gnädig seyn/ Beschre vnnnd erleuchte vnser verstockte vnd blinde Herzen mit deinem heiligen Geist/ daß wir der Warheit gehör vnnnd platz geben/die gnädige zeit vnserer heimsuchung / vnnnd was zu vnserm frieden dienet/erkennen/vnnnd dein zukünfftiges strenges Brtheil doch einmal warnemen lernen / Enstiehe vns nicht/ O Herz/dein seligmachendes Wort/ sondern erhalte vnd vollende das Werk/ das du durch deine Gnad vnd Barmherzigkeit in vns angefangen hast/damit du nicht gelästert/vnd dein heiliger grosser Name nicht entheiliget/sonder immer vnnnd ewiglich/hochgelobt/geehrt vnd gepriesen werde / durch deinen eingeliebten Sohn/vns fern getrewen Herin vnd Heyland Jesum Christum/ A M E N.

